


737

Ei8o

EISENBECK

OBSERVATIONES IN MONETAM GRAECAM

UNIVERSITY OF
ILLINOIS LIBRARY,
AT URBANA-CHAMPAIGN
CLASSICS



Digitized by the Internet Archive
in 2018 with funding from
University of Illinois Urbana-Champaign Alternates

CLASSICS

LIBRARY
OF THE
UNIVERSITY OF ILLINOIS

Observationes in monetam
Graecam.

~~~~~

DISSERTATIO  
INAUGURALIS PHILOLOGICA  
QUAM  
CONSENSU ET AUCTORITATE  
AMPLISSIMI PHILOSOPHORUM ORDINIS  
IN  
ALMA LITTERARUM UNIVERSITATE  
FRIDERICA GUILIELMA BEROLINENSI  
AD  
SUMMOS IN PHILOSOPHIA HONORES  
RITE CAPESSENDOS  
DIE XVII. M. JULII A. MDCCCLXXXIV  
H. L. Q. S.  
PUBLICE DEFENDET  
AUCTOR  
AEMILIUS EISENBECK  
GEDANENSIS.

✓

ADVERSARIORUM PARTES SUSCIPIENT:  
F. RICHTER, CAND. PHIL.  
CHR. SCHERER, CAND. PHIL.  
A. FRAATZ, CAND. PHIL.

—◆—

BEROLINI.  
TYPIS A. HACK.  
DOROTHEENSTR. 55.



## PARS I.\*)

# Quae a Graecis de ipsorum moneta tradita sint.

## A. Vocabula numaria.

In nullo alio genere Graeci magis sui fuerunt suumque ingenium comprobaverunt quam in re numaria. Quamquam enim gravissimis testibus Herodoto et Xenophane Lydos numorum cudendorum inventores fuisse constat<sup>1)</sup> publicus monetae usus in civitatibus Graecis primum institutus est, et vocabula ipsa, quibus Graeci in hoc genere utuntur, quid ab antiquioribus gentibus acceperint, quid ipsi primum instituerint et novaverint, luculenter significant.

μνᾶ. Omnia enim Graecae originis sunt, uno exempto, quod Boeckhio auctore Chaldaicum esse putamus: μνᾶ. Ad numerandum id pertinet<sup>2)</sup> et ostendit Graecos etiam hac arte ab Orientalibus imbutos esse. Nec quisquam mirabitur, illos peregrinam hanc vocem, ex qua Romani *minam* suam traxerunt, servavisse nec suam in linguam vertisse, quum id numorum genus, cui hoc nomen inditum erat, usum cotidianum parum attingeret.

τάλαντον. λίτρα. στατήρ. Sed utilitatem multo maiorem afferunt ad illam rem intellegendam vocabula τάλαντον, λίτρας, δραχμῆς, quippe quae ex appendendo metiendoque petita vestigia sint priorum temporum, quibus metallum nec formatum nec signatum trutina pensabatur, si quis merces soluturus erat, quemadmodum Aristoteles dicit (Pol. I 9): τὸ μὲν πρῶτον (τὸ νόμισμα) ἀπλῶς ὀρίσαντες μεγέθει καὶ σταθμῶ, τὸ δὲ τελευταῖον καὶ χαρακτῆρα ἐπιβαλόντες ἵνα ἀπολύσῃ τῆς μετρήσεως αὐτοῦς. Clarissima horum verborum documenta illa sunt numismata

\*) Alteram huius dissertationis partem, qua quae fuerint typorum usque ad Alexandri Magni aetatem genera et sensus agetur, mox publici iuris faciam in de Salletii „Zeitschrift für Numismatik“.

<sup>1)</sup> Herod. I 94. Pollux Onom. IX 83.

<sup>2)</sup> Böckh: Metrolog. Untersuchungen p. 34. 39.



summae vetustatis, quae nihil nisi lateres nude notati typum fasciatum vel rudem ferendi formam insignium loco perhibent.<sup>1)</sup> Postea demum signa impressa sunt.

Ac antiquos iam scriptores non fugit, Homeri *τάλαντον* aliud ac posteriorum esse, quod ex illis Iliadis versibus (VIII 69 sqq.):

καὶ τότε δὴ χρύσεια πατὴρ ἐτίτανε τάλαντα·

ἐν δ' ἐτίθει δύο χῆρε τανηλεγέος θανάτω,

Τρώων θ' ἵπποδάμων καὶ Λακων χαλκοχιτώνων

apertissime eluceret, lancem hic significatam esse, dum ex alio eiusdem carminis loco perspiceretur, talentum minoris pretii fuisse quam postea aestimatum esset (Poll. IX 55): ὅτι δὲ παρὰ τοῖς ἐφ' Ὀμήρου ὀλίγον τὸ τάλαντον ἡδύνατο μάθοις ἂν ἐκ τῆς ἵπποδρομίας, ἐν ᾗ τῷ μὲν τρίτῳ τὸ ἄθλον ἐστί λέβης, τῷ δὲ τετάρτῳ δύο χρυσοῖο τάλαντα.<sup>2)</sup> Cf. praterea Schol. ad Il. XXIII 269 cod. Venet. B. (ed. Dind. vol. IV): πῶς τῷ τετάρτῳ πάντων μεῖζον δίδωσι; φησὶν οὖν ὁ Ἀριστοτέλης μὴ εἶναι τὸ τάλαντον ὠρισμένον ποσόν, ἀλλὰ καὶ μεῖζονος λαμβάνεσθαι· νῦν μὲν γὰρ ὡς ἤττον ἔππου λαμβάνεται, ἐν δὲ ταῖς λιταῖς ὡς μεῖζον. Nostro autem tempore viri eruditi reputaverunt, id tantem valuisse, quanti Asiatici „shekel“, quod dicitur, duxissent.<sup>3)</sup>

Adice quod etiam *λίτρα* et *στατήρ* eiusdem fere notionis sunt: illius proprietas manifesta est, si *libra* Latini sermonis ad comparandum arcessitur; hic sicut *στάθυς* et *σταθμός* ex metiendo assumptus ad pendendum translatus est.

Quapropter *τάλαντον*, *λίτρα*, *στατήρ* semper ad genus quoddam ponderis et pecuniae appellandum usurpata sunt, et metaphorice ei, qui fenerantes aurum argentumve pensitant, *στατήρες* dicuntur.

<sup>1)</sup> The Numismatic Chronicle 1875 p. 259 sqq. (Barclay Head). — cf. Sontzo: Systèmes monétaires primitifs de l'Asie Mineure et de la Grèce. Bucharest 1884 p. 28 et p. 4: cependant que la science progresse, on constate tous les jours plus sûrement l'existence d'une circulation de métaux précieux en lingots de poids fixes, antérieurs à l'invention monétaire et cela suppose une relation presque forcée entre le poids de la première monnaie frappée et celui de l'unité de pesée; car l'on a sans doute estampillé pour la première fois le lingot déjà en circulation, précisément pour en garantir la valeur.

<sup>2)</sup> Il. XXIII 262 sqq.:

θῆκε γυναῖξ ἀγαγέσθαι ἀμύμονα ἔργα ἰδυῖαν

καὶ τρίποδ' οὐατόεντα δουκαιοικισμέτρον

τῷ πρώτῳ. ἀτὰρ αὖ τῷ δευτέρῳ ἔππον ἔθηκεν

ἔξετε· ἀομήτην, βρέφος ἡμίονον κυέουσιν·

αὐτὰρ τῷ τρίτῳ ἄπυρον κατέθηκε λέβητα

καλόν, τέσσαρα μέτρα κεχανδότα, λευκὸν ἐτ' αὐτως·

τῷ δὲ τετάρτῳ θῆκε δύο χρυσοῖο τάλαντα,

πέμπτῳ δ' ἀμφόθετον φιάλην ἀπύρωτον ἔθηκεν.

<sup>3)</sup> Bortolotti: Del talento Omerico, in Commentationibus Mommsenianis. Berol. 1877 p. 282 sqq.



Enimvero in Epicharmeo illo versu, quem auctor Etymologici Magni servavit, alius sensus inesse non videtur, etsi explicatione illa *στατήρες οἱ χρεῶσται* paullisper obscuratur: *Πολλοὶ στατήρες, ἀποδοτήρες οὐδὲ εἰς, Ἐπίχαρμος Προμηθεὺς*<sup>1)</sup>, i. e. creditorum multi, debitorum non unus. Ac Phoenicum haec verba nos monent, qui primi notissimique antiquitatis argentarii lucri causa feruntur libras induxisse<sup>2)</sup>: ab Asiaticis et numerandi et pendendi ars ad Graecos propagata est.

*δραχμή*. Vocabulum autem *δραχμή* videtur indicium esse inventi cuiusdam Graecorum: ut facilius citiusque pateret, num massa metalli iusta esset, tantummodo manu eam comprehendebant, trutina non usi. itaque monetam magis ad mercaturam faciendam accommodabant. Nam hanc vim nomini esse<sup>3)</sup>, non solum aliae voces eiusdem etymi ut *δράσσεσθαι* et *δράξ* sed etiam Plutarchus plane confirmat (Lys. c. 17): *τοσοῦτων γὰρ ἡ χεὶρ περιεδράττετο*<sup>4)</sup>. Sed nuperrime Soutzoius acute probavit, Lydos remotis iam temporibus *στατήρας* suos aequae dimidiassse numosque edidisse, qui drachmis Graecorum omnino respondissent<sup>5)</sup>. Itaque dubitari vix potest, quin etiam hoc vocabulum sicut *τάλαντον στατήρ*, *λίτρα* principio ex consuetudine quadam Asiaticorum profectum sit. Ac si quis accurate rem examinat, concedet opinor, homines primitiis rei numariae aliquantulum superatis ad res minoris pretii bilancem, ut ita dicam, paullatim abolevisse, metallum ad modum pugilli mensos. Simplicissimum est genus mensurae simulque ponderis, hodieque usurpatum<sup>6)</sup>, ut tarda pendendi opera liberet, quum ex prioribus experimentis constet, quanti ponderis massa quaedam eiusdem materiae eiusdemque mensurae sit. Fortasse etiam Aristoteles hanc rem illo loco iam enotato verbis *ὀρίσαντες μετέθεικε καὶ σταθμῶν* significat.

*νόμος νόμισμα*. Sed quantumvis Graeci ab aliis gentibus didicerint, semper id suos ad mores adaptaverunt peregrinamque formam vernacula commutaverunt. Moneta, quae apud Asia-

<sup>1)</sup> Lorenz: Fragm. Epicharmi n. 4

<sup>2)</sup> Joan. Lyd. de mens I 9 p. 5: *Φοίνικες πρῶτοι τοκογλύφοι καὶ ὀβολοστάται τυγχάνοντες γράμματα καὶ σταθμοὺς καὶ ἀπλῶς κερθαίνειν ἐπενόησαν, ὅθεν καὶ κατήλους αὐτοῦς οἱ ποιεῖται καλοῦσιν.* — cf. Movers: Das phöniz. Altertum III 1 p. 56, 116 sq. Böckh: Staatshaush. d. Athen. I p. 184 sqq.

<sup>3)</sup> G. Curtius: Grundzüge der griech. Etymol.<sup>4</sup> p. 211.

<sup>4)</sup> cf Pollux IX 77. Athenaeo auctore drachma alibi *ἀργυρίς* nominata est (IV 17).

<sup>5)</sup> Soutzo l. l. p. 12.

<sup>6)</sup> Exempli causa afferam, quae vir mihi cognatus familiarisque benigne de eius modi usu infectorum scripsit: „Handvoll“ bedeutet in erster Linie ein Mass; in zweiter Linie aber verstehen die Färber darunter insofern ein Gewicht, als sie mit einer Hand eine bestimmte Quantität erfassen, in specie bei Baumwollengarn 1 Pfund, oder, falls es „gerungen“ ist, 2 Pfund.

ticos regis iussu feriebatur, apud Graecos singularum civitatum erat, quarum propter multitudinem, non uni imperio subiectam, tamquam legitimum institutum habebatur, ne cuilibet liceret vilitatem ei facere. Huius rei testes sunt νόμος et νόμισμα, quorum alter ad legem pertinet vel ad ea, de quibus cives convenerunt, alterum ad ea, quae legibus sancita sunt. Nam Aristoteles ea sic definivit (Rhet. I 10,2): νόμος δ' ἐστὶν ὁ μὲν ἴδιος, ὁ δὲ κοινός· λέγω δὲ ἴδιον μὲν καθ' ὃν γεγραμμένον πολιτεύονται· κοινὸν δέ, ὅσα ἄγραφα παρὰ πᾶσιν ὁμολογεῖσθαι δοκεῖ; — (Ethic. V 8): ὑπάλλαγμα τῆς χρείας τὸ νόμισμα γέρονεν κατὰ συνθήκην· καὶ διὰ τοῦτο τοῦνομα ἔχει νόμισμα, ὅτι οὐ φύσει ἀλλὰ νόμῳ ἐστίν, καὶ ἐφ' ἧμῶν μεταβαλεῖν καὶ ποιῆσαι ἄχρηστον, quibus adiungamus, quae Athenaeus ex eodem auctore excerpserit (XI p. 508 A): νόμος γάρ ἐστιν, ὥς φησιν Ἀριστοτέλης, λόγος ὠρισμένος καθ' ὁμολογίαν κοινὴν πόλεως, μὴνύων πῶς δεῖ πράττειν ἕκαστα. Quum autem cives legibus sive γεγραμμέναις sive ἀγράπτοις vetarentur aliquid conari, quod omnium eorum consuetudini repugnaret, νόμος nimirum etiam ad consuetudinem ipsam adhibebatur, velut Sophocles Aiacem, qui Eurysacem filium socii mandat, haec facit loquentem (Ajax 548 sq.):

ἀλλ' αὐτίκ' ὠμοῖς αὐτὸν ἐν νόμοις πατρὸς  
δεῖ πωλοδαμνεῖν κάξιοιμοῦσθαι φύσιν.

His vocabulis in pecuniam translatis perspicuum fit, quantum ei ponderis inesse Graeci voluerint. Nec exempla requirenda sunt, quae hunc νόμον et νομίματος usum testentur. quandoquidem inter omnes constat, colonos Sicilienses Italicosque quoddam numorum genus νοῦμον nominavisse, Romanosque numi vocabulum ab eis accepisse. Suo igitur iure Pollux annotat (IX 79): ὁ δὲ νοῦμος δοκεῖ μὲν εἶναι Ῥωμαίων τοῦνομα τοῦ νομίματος· ἔστι δὲ Ἑλληνικὸν καὶ τῶν ἐν Ἰταλίᾳ καὶ Σικελίᾳ Δωριέων, et Suidas profert (s. v.) Δωριεῖς δὲ ἐπὶ νομίματος χρῶνται τῇ λέξει, καὶ Ῥωμαῖοι παραστρέφαντες νοῦμμον λέγουσι. Ad νόμισμα autem, quo Graeci saepissime pecuniam significaverunt, praeter locum illum Aristotelicum alius orationis Demosthenicae (c. Timocr. XXIV § 212 sq.) proferatur: λέγεται γὰς τοῖς δικασταῖς αὐτὸν (sc. Σόλωνα) εἰπεῖν . . . ὅτι νόμος ἐστὶν ἀπάσαις ὡς ἔπος εἰπεῖν ταῖς πόλεσιν, ἐάν τις τὸ νόμισμα διαφθείρῃ, θάνατον τὴν ζημίαν εἶναι, et paullo post: ἀργύριον μὲν νόμισμ' εἶναι τῶν ἰδίων συναλλαγμάτων ἕνεκα τοῖς ἰδιώταις εὐρημένον, τοὺς δὲ νόμους ἡγοῦντο νόμισμα τῆς πόλεως εἶναι. Optime haec cum eis congruunt, quae ex nominibus ipsis sequuntur: quemadmodum numi legitimi sunt nec adulterari debent, ita leges monetae loco habendas privati commodi causa novare non licet.

Romanis denique quibus a Graecis non solum numi sed etiam talenti, librae, drachmae, numismatis nomina obvenerunt,

usitatissima eorum *numus* et *libra* fuerunt, utpote quum Graeci, qui Italiam Siciliamque tenebant, hac sicut alliis in rebus magistri Romanorum, monetae hanc partitionem admoverent: νοῦμος, λίτρα, οὐγκία. Eadem de re unciae quoque nomen Romanis fuit.

ὀβολός, οὐγκία. Tum aliae sunt significationes, ex quibus apparet, Graecis eadem rei numariae primordia fuisse quae de aliis Asiaticorum et Europaeorum gentibus traduntur. Scilicet compluribus ex testimoniis, sive ex monumentis sive ex scriptoribus, facile colligitur, Assyrios, Phoenices, Aegyptios, Italicos, Gallos, Britannos principio lateribus sive placentis sive annulis ex quocunque metallo factis in solvendo usos esse<sup>1)</sup>, quamquam pro certo non habemus, quid eorum primum fuerit. Huc videntur Graecorum ὀβολός et οὐγκία referenda esse. Nam quum multis antiquorum auctorum testimoniis certissime confirmetur ὀβολῶν sicut ὀβελῶν et ὀβελίσκων, qui ei maxime propinqui sunt, genuinam fuisse verum notionem, opinio veri simillima est, vetustam illam pecuniam, quae ante Phidonis aevum exstitisset, ad verum modum formatam fuisse monetaeque noviciae nomen suum porrexisse. Haec Plutarchus iam suspicatus est, qui ita scribit (Lys. c. 17): κινδυνεύει δὲ καὶ τὸ πᾶμπαν ἀρχαῖον οὕτως ἔχειν ὀβελίσκοις χρωμένων νομίμασι σιδηροῖς· ἀφ' ὧν παραμένει πλῆθος ἔτι καὶ νῦν τῶν κερμάτων ὀβολοὺς καλεῖσθαι, quibuscum compares, quae apud Pollucem leguntur (IX 77): τὸ μέντοι τῶν ὀβολῶν ὄνομα οἱ μὲν ὅτι πάλαι βουπόροις ὀβελοῖς ἔχρωντο πρὸς τὰς ἀμοιβάς. Ac quod hic quidem auctor ὀβελοὺς illos βουπόρους appellat, ad rem nihil valet, nam ex more grammaticorum posterioris aetatis hoc vocabulum appositum est. Phido igitur, Argivorum rex, pro veribus ferreis numismata insignita emisit, quorum uni generi pervulgatum illorum nomen indidit; verua illa ipsa Junoni Argivae dedicavit, quum in templis deorum res prioris aevi quasi memoriae causa asservari solerent; cf. Phot. Bibl. s. v. ὀβολός· πάντων δὲ πρῶτος Φεῖδων Ἀργεῖος νόμισμα ἔκοψεν . . . καὶ δούς τὸ νόμισμα καὶ ἀναλαβὼν τοὺς ὀβελίσκους ἀνέθηκε τῇ ἐν Ἀργεὶ Ἥρᾳ. Quod autem Aristoteles oboli vim sic explicat (apud Poll. l. 1.): ὀφελοὺς αὐτοὺς τέως ὀνομάσθαι, τοῦ μὲν ὀφέλλειν δηλοῦντος τὸ αὖξιν, αὐτῶν δὲ διὰ τὸ εἰς μῆκος ἠϋξῆσθαι ὥδε κεκληθέντων, si recte haec ei attribuuntur, assensum vix habebit, quum quisquis videat, desultoriam hic interpretationem excogitatam esse, quae fortasse ex enunciatis ὀβολοστάτης i. e. τοκογλύφος, ὀβολοστατῆσαι i. e. τόκους λαβεῖν<sup>2)</sup> fluxerit. Propius vero accedit Plutarchus: ὀβολός παρὰ τὸ

<sup>1)</sup> Brandis: Münz- Maass- und Gewichtswes. in Vorderas. p. 78 sqq.

<sup>2)</sup> Phot. Bibl. s. v.

ὑπισθεν βάλλεσθαι, si pro circumlocutione βέλους i. e. verus haec habemus et peculiarem etymi rationem negligimus, qua hoc nomen ex ὑπισθεν et βάλλεσθαι coalitum fingitur<sup>1)</sup>.

Quid? οὐγκίας significatio nihil aliud quam curvatam i. e. anulariam speciem attingere videtur. quia omnia vocabula eiusdem originis velut ὄγκος, ὄγκιον, ὄγκων aliaque Romanorum similia huc spectant<sup>2)</sup>. Itaque si monumentis docemur. Asiaticos Aegyptiosque remotis temporibus in rebus persolvendis tortos aureos argenteosque anulos usurpavisse, si non ignoramus, Phoenices Siciliam insulam sedem sibi delegisse, priusquam Graeci colonos eo misissent, vix dubium erit, quin hi quoddam illorum nomen suum in sermonem transtulerint. Romanis autem, quamquam una cum arte numaria etiam hanc vocem a Graecis finitimis didicerunt, priscis temporibus nonnisi lateres fuerunt aenei, quorum plures in lucem protracti sunt.

πέλανορ. φθοῖδες. κόλλυβος. Praeterea exstant vocabula, quae ita inter se cohaerent, ut ad placentarum formam pertineant. Sed nescio an cuivis eorum eadem ac ὀβολῷ et οὐγκία vetustas assignanda sit, quum eae appellationes facillime ex ipsa omnis monetae forma petantur nec necessario priori aevo debeantur. Quamquam illa in medium proferre licebit: πέλανορ, φθοῖδες, κόλλυβος.

Vocabulum, quod primo loco posui, πέλανορ Dorici sermonis plane est Atticorum πέλανος, cui subest vis libi, ut ex Hesychio elucet (s. v.) πέμνια πλακουντῶδες ἐκ παιτάλης εἰς θυσίαν ἐπιτήθειον. Adiungas Platonem (de legg. VI p. 782 C): πέλανοι καὶ μέλιτι καρποὶ δεδευμένοι καὶ τοιαῦτα ἄλλα ἀγρὰ θύματα et Sannyrionem Comicum<sup>3)</sup>:

πέλανον καλοῦμεν ἡμεῖς οἱ θεοί,  
ἀ καλεῖτ' ἀσέμνως ἄλφιθ' ὕμεις οἱ βροτοί.

Ac fortasse Hultschii coniecturae adstipulabere, qui hoc Lacedaemoniorum numisma uno obolo aestimavit<sup>4)</sup>; nam Suidae testimonium videtur ei adminiculum esse (s. v.): ὁ τῷ μόντει διδόμενος μισθὸς ὀβολός. Quantum autem Scapthylaeorum φθοῖδες valuerint, certo statui nequit, quum ex Hesychio tantummodo intellegatur, minimi eos pretii fuisse: φθοῖς, πλακοῦς, καὶ τὰ

<sup>1)</sup> G. Curtius l. l. p. 476.

<sup>2)</sup> Curtius l. l. p. 130.

<sup>3)</sup> Compares quae apud Harpocratonem praeter hos versus s. v. πέλανος annotata sunt: Ἀπολλώνιος δ' ὁ Ἀχαρνέως ἐν τῷ περὶ τῶν ἐορτῶν οὕτω γράφει: „ὁμοίως δὲ καὶ ὁ προσαγορευόμενος πέλανος. λέγει δὲ πέμματα τίνα τοῖς θεοῖς γινόμενα ἐκ τοῦ ἀφαιρεθέντος σίτου ἐκ τῆς ἄλω“ et quae in „Bulletin de correspondance hellénique“ 1880 p. 227 l. 36 sqq. leguntur: θύειν δὲ ἀπὸ τοῦ πελάνου καθότι ἂν Εὐμολπιδῶν ἐσηγήσωνται . . . τοῖν θεοῖν (sc. τοῖν Ἐλευσινίῳ) ἑκατέρω ἀπὸ τῶν χρυθῶν καὶ τῶν πυρῶν.

<sup>4)</sup> Hultsch Griech. und röm. Metrol.<sup>2</sup> p. 535.



πρὸς λεπτόν ἀληθεσμένα· καὶ ἀπορρέον φῆγμα τοῦ χρυσοῦ. Numos vero eos fuisse Boeckhius summam ad probabilitatem adduxit, qui monstravit, aliquoties quendam φθοίδων numerum in rationes praefectorum aerarii Atheniensis relatum esse<sup>1)</sup>.

Item κόλλυβος principium ducit ab opusculo pistorio, quia non modo κόλλα et κολλᾶν, quae glutini glutinandique notione sunt, cum eis artissime coniuncta sunt, sed etiam κόλλαβος ad placentas significandas a Graecis usurpatus est, ut his Aristophaneis versibus ante oculos ponitur (Ran. 504 sqq.):

ἦ γὰρ θεός σ' ὥς ἐπύθεθ' ἤχοντ' εὐθέως  
ἐπέττεν ἄρτους - - - - -  
πλακοῦντας ὥπτα, κολλάβους.

Sed collybus minimus numulus aeneus erat, in aliena moneta permutanda aptissimus ad deductionem, quae dicitur, faciendam<sup>2)</sup>. Quare hoc vocabulum sicut λεπτόν i. e. levidense sc. numisma non videtur indicium vetustioris consuetudinis esse, sed ad parvulam numerum formam referendum.

Nec commemoratione indigna sunt ea numismata, in quibus inscriptum est, quantum valerent. Praeterimus hic illa, in quibus pretium nonnisi initialibus litteris nominis indicatur, velut Δ - δραχμή, Θ - θβολός vel οθγκία, et illa, quorum typis varie formatis et repetitis idem efficitur, quod hae significationes interdum dubiae sunt<sup>3)</sup>; versamur in eis, quorum inscriptiones satis clarae sunt. Imhoofus-Blumerus in praestantissimo suo libro (Monnaies Grecques) nonnulla Chiorum exemplaria aenea vulgavit, quae sic denotata sunt: θβολός; δίχαλχον; τρίχαλχον<sup>4)</sup>. His addamus argentea Agrigentinorum, Crotoniatarum, aliarum urbium Magnae Graeciae Siciliaeque, quorum ΔΙ vel ΔΙΙ manifestae vocabuli λίτρα designationes sunt<sup>5)</sup>. Quamquam Lambros, vir eruditus, videtur suo iure contendere, nomina pretii plene scripta in numis aetatis demum imperatorum Romanorum legi<sup>6)</sup>.

<sup>1)</sup> C. J. G. I p. 219 cf. Böckh: Staatsh. d. Ath.<sup>2</sup> II p. 70 l. 38.

<sup>2)</sup> Pollux III 84: ἀργυρίου ἀλλαγὴ ὁ καλούμενος κόλλυβος. — cf. Cicero in Verrem Act. II l. III 78, 181: ex omni pecunia, quam aratoribus solvere debuisti, certis nominibus deductiones fieri solebant: primum pro spectatione et collybo, deinde pro nescio quo cerario. Haec omnia, iudices, non rerum certarum, sed furtorum improbissimorum sunt vocabula. Nam collybus esse qui potest, cum utantur omnes uno genere numerum.

Pollux IX 72: Καλλίμαχος γοῦν ἔφη περὶ τῶν ἐν Ἀίδου λέγων

ἐκ τῶν ὅκου βοῦν κολλύβου πιπρήσκουσιν

ὥς ἂν ἔιποι τις τοῦ προστυχόντος.

<sup>3)</sup> cf. Zeitschr. für Numismat. (Berlin.) II p. 160 sqq. (Lambros). Gardner: The types of Greek coins p. 65 sq.

<sup>4)</sup> p. 298 sq.

<sup>5)</sup> Imhoof-Blumer l. l. p. 14 sq. Sambon: Monnaies de la presque ile italique p. 321 sqq.

<sup>6)</sup> Zeitschr. f. Num. l. l.

ἀργύριον. χρυσίον. χαλκοῦς. σιδάρεος. Restat ut ad alia nomina numaria accedamus, ex metallo assumpta, quo moneta constabat, partim pecuniam ipsam ut ἀργύριον et χρυσίον, partim quaedam eius genera, ut χαλκοῦς et σιδάρεος attingentia. Ac creberrimum eorum nimirum ἀργύριον erat, quia Graeci ante omnes nihil fere aliud nisi argentum notaverunt, si aes omittimus, ea tantum in urbe probatum, ubi signatum erat. Magna autem aliorum testimoniorum copia neglecta ad illud numisma Seuthae, Thraciae regis, animum intendamus, cui inscriptum est: Σεῦθα ἀργύριον<sup>1)</sup>. Multo rarius Graecis aurum fuit, apud Asiaticos priscis iam temporibus cusum. Itaque nemo mirabitur, perpauca exempla esse, quorum χρυσίον locum νομίσματος teneat. His enim Aristophaneis versibus (Ran. 717 sqq):

πολλάκις γ' ἡμῖν ἔδοξεν ἡ πόλις πεπονθέναι  
τάντων ἔς τε τῶν πολιτῶν τοὺς καλοὺς τε κάγαθούς,  
ἔς τε τὰρχαῖον νόμισμα καὶ τὸ καινὸν χρυσίον.  
οὔτε γὰρ τούτοις οὐδὲν οὐ κεκλιθῆναι μένεις,  
χρώμεθ' οὐδέν, ἀλλὰ τούτοις τοῖς πονηροῖς χαλκίοις,

angustiae Atheniensium tanguntur, qui quum classem ad Cononem liberandum ornarent (ao. 407 a. Ch.) etiam aureas Palladis opes ad monetam feriendam conflaverunt multumque aeris auro admiscuere<sup>2)</sup>.

Aliter res se habet, quod χαλκοῦς et σιδάρεος tamquam propriae appellationes generis cuiusdam numarii traduntur. Quorum alter, vulgare Atheniensium numisma, satis notus est, alter a Lacedaemoniis et Byzantiis emissus, a Polluce commemoratur (IX 78): Βυζαντίων γε μὴν σιδήρεω νομιζόντων ἦν οὕτω καλούμενος σιδάρεος νόμισμά τι λεπτόν, ὥστε ἀντὶ τοῦ „πρίω μοι τριῶν χαλκῶν“ λέγειν „πρίω μοι τριῶν σιδαρέων“ ὅθεν καὶ ἐν τοῖς Στρατιῶδος Μυρμιδόσιν εἴρηται

ἐν τοῖσι βαλανείοις προκέλευθος ἡμέρα,  
ἀπαξάπασα γῇ στρατιαὶ σιδαρέων.

σιδήρεω δὲ νομίσματι καὶ Λακεδαιμόνιοι χρῶνται, ἐκ πολλοῦ ὄγκου ὀλίγον δυναμένω. Ac in propatulo est, neque Athenienses neque Lacedaemonios χαλκοῦς et σιδαρέους suos formavisse, propterea quod aurum argentumve defecisset, sed ut numulos minoris pretii haberent aut cives impedirent, quominus cum exteris nationibus mercaturam facerent. Nam persuasum sibi habebat non solum Lycurgus vel qui alii fuerunt prisci Lacedaemoniorum legumlatores, eos, si moneta quam vilissima

<sup>1)</sup> Zeitschr. f. Num. III p. 241. cf. Xenoph. Anab. VII 1, 5.

<sup>2)</sup> Abhandlg. der Berl. Akad. d. Wissensch. 1864 p. 55 (Kirchhoff).  
Göckh: Staatshaush. dr. Athen. I p. 33.

uterentur nec aliis cum gentibus commercium haberent, divitiis earum non pellectos diutius sinceros fore, sed etiam Plato commenticiae suae civitati simile praeceptum dedit<sup>1)</sup>. Accedit ad illum Pollucis locum praeter eandem fere aliorum auctorum memoriam quod Koehlerus nuper plura exemplaria ferrea Argivorum, Tegeatarum Heraeensiumque Arcadiae in publicum protulit, ex quibus probabiliter concluditur, primo omnes Peloponnesiacos ferro persolvisse<sup>2)</sup>: Lacedaemonii etiam multo post Lycurgi aetatem, quum mores viderentur depravati esse, vetustam illam consuetudinem repetiverunt<sup>3)</sup>; Argivi et Arcades nescio an post pugnam illam Leutricam item eam affectaverint, quandoquidem haec eorum numismata Koehlero iudice circa medium quartum a. Ch. saeculum percussa sunt. Nec quidquam repugnare videtur, quod aliunde constat, Arcades post illustrem illam Epaminondae victoriam multis rebus pristina instituta renovavisse et, aliis praetermissis, ex more prioris aevi numos effigie Jovis Lycae Panisque, qui civitatibus eorum foederatis praesidebant, et monogrammate litterarum initialium nominis Arcadum rursus insignivisse<sup>4)</sup>. Utrum vero *σιδάρες* Byzantiorum, qui Megarensium coloni erant, eandem habuerint originem Peloponnesiacam an propter quandam rei numariae difficultatem in usu fuerint, hoc quidem tempore diiudicare non possumus. Etenim ex Aristotele aliisque scriptoribus accipimus, hanc ob causam Clazomenios ferream, Dionysium Syracusanorum tyrannum plumbeam monetam fecisse, alios Graecos vel corium adhibuisse<sup>5)</sup>.

*χόμμα. παῖμα. χάραγμα. χαρακτήρ. τύπος. τύπωμα.* Sed necessario Graeci, si numos publicam civitatum rem existinauerunt, imprimis id egerunt, ut illi acuratissime flarentur et ferirentur. Huius rei non solum permulta exemplaria conservata sed ea quoque vocabula testes sunt, quae a percutiundo tracta typis significandis inserviverunt, velut *χόμμα, παῖμα, χάραγμα, χαρακτήρ*. Nam nonnulla numismata Seuthae et Cotyis, regum Thraciae, et Achaeorum et Gortyniorum sic notata sunt: *Σεύθα χόμμα*<sup>6)</sup> et *Γόρτυνος τὸ παῖμα*<sup>7)</sup>, et *Αχαιῶν χάραγμα*<sup>8)</sup> et *Κότυος χαρακτήρ*.<sup>9)</sup>

<sup>1)</sup> Plato de legg. V p. 742.

<sup>2)</sup> Mitteil. des dtsh. archäol. Institut. in Athen. VII p. 1 sqq. 337.

<sup>3)</sup> Plut. Lys. c. 16 sq.

<sup>4)</sup> Zeitschr. f. Num. IX p. 26 sqq. cf. Pinder et Friedländer: Beiträge zur alten Münzkunde. p. 85 sqq.

<sup>5)</sup> Aristot. Oecon. II p. 1348 (Bekker); ibid p. 1349. cf. G. Hermann: Privataltertümer (ed. Blümner) p. 451 sq.

<sup>6)</sup> Archäol. Zeitg. 1879 p. 30.

<sup>7)</sup> Zeitschr. f. Num. III p. 241. cf. Arch. Zeitg. 1873 p. 101.

<sup>8)</sup> Sestini: Museo Fontana II t. V 15. Numism. Chron. 1864 p. 88. t. III 13. Falso hic *χαρασμα* legitur.

<sup>9)</sup> Zeitschr. f. Num. I. 1.



Ac *παῖμα* quidem, quamquam scriptis Graecorum non exhibetur, tamen procul dubio a verbo *παίειν* i. e. ferire derivatum est. Similis vis inest *χαράγματι* et *κόμματι*, quorum alterum ad signum incisum vel impressum, alterum ad numisma percussum pertinet. Sed quemadmodum *κόμμα* pedetemptim ad pistillum appellandum adhibetur, quo percutitur, ut his ex versibus Aristophaneis elucet (Ran. 725sq):

(*χρώμεθ' οὐδέν,*) ἀλλὰ τοῦτοις τοῖς πονηροῖς χαλκίοις,

χθές τε καὶ πρῶν κοπέισι τῷ κακίστῳ κόμματι,

ita *χαρακτήρ* a pistillo assumptus, quo insignia inculpantur, ad notam impressam transiit, velut apud Aristotelem legitur (Pol. I 9): ὁ γὰρ *χαρακτήρ* ἐτέθη τοῦ ποσοῦ σημείων. Hinc manat, si utrumque hoc vocabulum etiam ad ingenium ac mores hominum translatum est, quibus aequae peculiaris quaedam signa videntur esse. Aristophanes enim, ut *χαρακτήρα* praetermittamus, dicit (Plut. 861sq):

προσέρχεται γὰρ τις κακῶς πράττων ἀνὴρ.

ἔοικε δ' εἶναι τοῦ πονηροῦ κόμματος.

His nominibus duo apponantur alia, quae ab icendo ducta ad scalpendum spectant notasque numarias attingunt: *τύπος* et *τύπωμα*. Illam enim *τύπου* vim praeter hunc locum Plutarcheum (Alex. c. 17): δέλτον ἐκπεσεῖν χαλκῆν, *τύπους* ἔχουσαν ἀρχαίων γραμμάτων, usus ille vulgaris sermonis prodit, quo eadem vox ad anaglypha transfunditur, sicut apud Pausaniam legimus (IX 11. 3): ἐνταῦθά εισιν (sc. Thebis) ἐπὶ τύπου γυναικῶν εἰκόνες... ἀμυρότερα ἢ δὴ τὰ ἀγάλματα... ταύτας κυλοῦσιν οἱ Θηβαῖοι φαρμακίδας et alibi (II 19, 7); ἔστι δὲ ἔμ-προσθεν τοῦ ναοῦ (sc. templi quod Apollini Lycio Argis consecratum erat) βόθρος, πεποιημένα ἐν τύπῳ ταύρου μάχην ἔχον καὶ λύκου, σὺν δὲ αὐτοῖς παρθένον ἀφιείσαν πέτραν ἐπὶ τὸν ταῦρον. Itaque Hesychius in signis numariis describendis eam usurpat: Κυζικηνοὶ στατήρες πρόσωπον δὲ ἦν γυναικὸς ὁ τύπος. Eandem habet originem *τύπωμα*, quod apud Pollucem invenitur (IX 73): οἱ μέντοι τὸν βοῦν, τὸ ἐκ τοῦ τυπώματος οὕτω κληθὲν νόμισμα, καὶ Ὀμηρον εἰδέναι νομίζοντες.

*σῆμα*. *σημεῖον*. *σύμβολον*. Sed quantumvis Graeci propter communem omnium utilitatem numos quam diligentissime cudendos curaverint, tamen eo, quod moneta reipublicae institutum erat, aliud ac ex sensu illius aetatis multo gravius effectum est. Nam quum Graeci persuasum haberent, omnia, quaecumque ad publica negotia quidquam valerent in eximia numinum tutela esse, imprimis rem numariam deis consecraverunt eorumque notis signaverunt. Ac incunabula eius ipsis delubris videntur deberi, si quidem quadam cum probabilitate suspicari possumus, Sardibus sacerdotes Cybelae omnium pri-

mos aurum leone, deae insigni, denotavisse, ut advenae eo in sacris aliisque rebus solvendis uterentur<sup>1)</sup>, itemque forsā vetustissima Graecorum numismata principio ex templis profecta esse. Abs Phidone inde, qui prisca illa Peloponnesiorum verua ferrea Junoni Argivae dedicaverat et novum pecuniae genus emiserat, usque ad aevum Romanorum imperatorum Graeci numos divorum proprios habuerunt. Contra Asiatici non tam posteriore tempore, quam Lydi imprimere coeperant, prioris consuetudinis inmemores eos quasi rem profanam regia imagine exornaverunt. Satrapae autem, quorum in ditione multi Graeci erant, et horum moribus obsecuti notas deorum urbium praesidum et regis instar suorum ipsorum effigiem superficiei numariae, ut ita dicam, inciderunt.

Ac plura exemplaria servata sunt, quorum ex inscriptionibus patet, monetam non modo deis sacram fuisse sed quibusdam locis diu cum cultu fanisque artissime cohaesisse. Sunt enim numismata aenea Milesiorum, Pheneatarum, Hipponensium Ital., argentea Crotoniatarum, Metapontiorum sic notata: ἡ ἐν Αἰδύμων ἱερῇ<sup>2)</sup>, ἐπὶ ἱερῆος (sic) Ἑρμαζίου<sup>3)</sup>, Διὸς Ὀλυμπίου<sup>4)</sup>, ἱερὸν τοῦ Ἀπό(λλωνος)<sup>5)</sup>, Ἀχελφῶος ἁδλῶν<sup>6)</sup>. Quamquam animadvertendum est, illa Crotoniatarum Metapontiorumque aetate multo praecedere eis Milesiorum Pheneatarumque, nam sexto sane a. Ch. saeculo assignanda sunt. Et hic iam cognoscitur, id quod postea typis comprobabitur. numos Graecorum Italiae Siciliaeque cum numinibus cultuque magis coniunctos fuisse quam ceterorum Graecorum, qui recentiore demum aevo vetusta eius modi instituta interdum redintegrare.

Separanda sunt ab his numismatis alia, quae litteris AN vel ANAΘ signata, velut tetradrachmum Πτολεμαίου Σωτῆρος: Σαράπ(ιδι) ἀν(άθημα), dona sunt immortalibus consecrata.<sup>7)</sup> Praeclarum eorum exemplum est numus Stratonicensium, Caracalla et Geta imperatoribus cusus, in quo capitis Getae exsculpti loco caput Palladis et vocabulum θεοῦ impressum est. Hanc monetae dedicandae consuetudinem, priscis

<sup>1)</sup> E. Curtius: Ueber den religiösen Charakter der Münzen. Monatsb. Berl. Ak. 1869 p. 465 sqq.

<sup>2)</sup> Millingen: Sylloge p. 71.

<sup>3)</sup> Zeitschr. f. Num. IX p. 37. Imhoof-Blumer: Monnaies Grecques p. 205.

<sup>4)</sup> Imhoof-Blumer l. l. p. 8.

<sup>5)</sup> Sambon l. l. p. 325 sqq.

<sup>6)</sup> Archäol. Zeitg. 1862 p. 321. Königl. Münzk. n. 678. Mus. Brit. Catalogue of Greek. coins, Italy p. 238 sqq.

<sup>7)</sup> Percy Gardner: Votive coins in Delian inscriptions. Journal of Hell. studies. 1883. cf. Homolle: Comptes des hiéropes du temple d'Appolon Délien. Bulletin de correspond. hellénique. 1882 p. 131 sqq.

iam temporibus Pausania auctore notam (I 34, 4): ἔστι δὲ Ὠρωπίοις πηγὴ πλησίον τοῦ ναοῦ, ἣν Ἀμφιαράου καλοῦσιν, οὗτε θύοντες οὐδὲν ἐς αὐτὴν οὔτ' ἐπὶ καθαρσίοις ἢ χέρυνβι χρῆσθαι νομίζοντες. νόσου δὲ ἀχεσθείσης ἄνδρσι μαντεύματος γενομένῳ καθέστηκεν ἄργυρον ἀφεῖναι καὶ χρυσὸν ἐπίσημον ἐς τὴν πηγὴν. Graeci usque ad nostram aetatem tenuerunt.

Sed unum superest, quo certissime confirmatur, insignia numorum sacerdotum in usu fuisse documentisque auctoritatem eorum dedisse. Proximo scilicet anno quum reliquiae maioris templi Selinuntii (C) effoderentur, quod in arce urbis exstructum a nonnullis viris doctis Herculi attribuitur, per multa hic sigilla figlina in lucem prodierunt, antea certe documentis, quae combusta sunt, allegata, quae praeter notas utriusque hominis paciscentis saepenumero signum numarium Selinuntiorum, Herculem taurum domantem, perhibent, nonnunquam littera Σ adscripta.<sup>1)</sup> Memorabilis sane haec res est et plane ostendit, unde typorum exordium fuerit.

Maximi igitur momenti videtur esse, quod Graeci prioris aevi illos praecipue ex symbolis elegerunt. Quamquam enim vix quisquam negabit, tunc deos ad hominum formam iam effictos esse, tamen non ita saepe nec tam remoto tempore imagines deorum repraesentatas videmus. Perspicuum est, ea in re multum inesse, quod utilitatem afferat ad mythologiam clariore luce collustrandam. Et ipsorum Graecorum obvenit testimonium, ex quo sequitur, ut illa symbola deorum fuerint notae.

Nam paullulum ante hos dies numus aureus elatus est,<sup>2)</sup> quem Fraenckelii disputationem amplexi Ephesium esse putamus; anteriori parti cervus pascens incisus est, his verbis additis: Φαινοῦς εἰμὶ σῆμα. Phaeno Dianae ut deae luciferae cognomen esse, facile est ad coniciendum, quum ei hoc imprimis animal adiunctum sit. Ac magnae vetustatis hoc numisma est, sive effigiem cervi et litteraturam intuemur, sive memoriam illorum monumentorum repetimus. quae item antiquis temporibus fabricata ipsa nunciant, quid velint.<sup>3)</sup> Quod autem ad σῆμα attinet, de unoquoque signo, quo quis rem agnoscit, sive imagine sive litteris, usurpatum, ad illam inscriptionem numariam hos Iliadis versus apponere satis sit (VI 168sq):

πέμπτε δέ μιν Λυκίηνδε, πόρεν δ' ὁ γε σήματα λυγρά,

<sup>1)</sup> A. Salinas: Dei sigilli di creta rinvenuti a Selinunte. Rom. 1883.

<sup>2)</sup> Archäol. Zeitg. 1879 p. 27 sqq.

<sup>3)</sup> Inter multa alia eiusdem generis exempla hoc unum commemorare satis habeamus: Ταταῖης εἰμὶ λήκυθος (C. J. Ant. n. 524). De numis similia contulit Salletius: Zeitschr. f. Num. I p. 278.

γράφας ἐν πίνακι πτυκτῷ θομοφθόρα πολλά.

Praeterca σημεῖον similis sensus proferamus liceat, etsi in numismatis non legitur. Ad symbolum enim divinum id tendit his in versibus Aeschyleis (Suppl. 207 sq. ed. Kirchhoff):

X. τὶν' οὖν κικλήσκω τῶνδε δαιμόνων ἔτι;

Δ. ὁρῶ τρίαINAN τήνδε, σημεῖον θεοῦ,

ad signum hominis cuiusdam (metaphorice Δήμου) annulo insculptum hoc loco Aristophaneo (Equit. 951 sqq.):

Δ. οὐκ ἔσθ' ὅπως ὁ δακτύλός ἐσθ' οὐτοσί

οὐμός· τὸ γοῦν σημεῖον ἕτερον φαίνεται,

ἀλλ' ἢ οὐ καθορῶ. Α. φέρ' ἴδω, τί σοι σημεῖτον ἦν;

Multo vero saepius quam σῆμα et σημεῖον vocabulum συμβόλου, in notis ac praecipue, in tesseris quibuscunque, quum militaribus tum iudiciariis contionalibus aliisque adhibitum est. Pauca huius notionis exempla in testimonium vocemus: Aeschyl. Agam. 8 sqq.:

καὶ νῦν φυλάσσω λαμπάδος τὸ σύμβολον,

αὐγὴν πυρὸς φέρουσαν ἐκ Τροίας φάτιν

ἀλώσιμόν τε βάζειν.

Eurip. (?) Rhes. 572 sq. (ed Kirchhoff):

Ο. ἦν δ' οὖν ἐγείρης, οἶσθα σύνθημα στρατοῦ;

Δυ. Φοῖβον Δόλωνος οἶδα σύμβολον κλύων.

Bekker Anecd. p. 301, 1: γραμματεῖον τι, ὃ ἐλάμβανε τῶν δικαστῶν ἕκαστος εἰσιῶν εἰς τὸ δικαστήριον, ὃ ἔστι πινάκιον.

Aristoph. Eccles. 297 sqq:

ὅπως δὲ τὸ σύμβολον

λαβόντες ἔπειτα πλη —

σίον καθεδούμεθ', ὥς

ἂν χειροτονῶμεν.

Sed quamvis optatum esset, si idem nomen propterea, quod eo insignia quoque deorum comprehenderentur, etiam ad rem numariam pertineret, tamen hic ei locus non est. Sin autem Pollux numisma ita appellatum contendit pluribusque verbis explicare studet, confundit res, quae eadem omnino non sunt. Ponamus igitur ipsa scriptoris verba, ut facilius intellegatur, quomodo difficultas tollenda sit (IX 71 sqq.): εἶγ δ' ἂν καὶ σύμβολον βραχὺ νόμισμα ἢ ἡμίτομον νομίσματος. ὁ γοῦν Ἑρμῆπος ἐν μὲν Φορμοφόροις λέγει

παρὰ τῶν καπῆλων λήφομαι τὸ σύμβολον<sup>1)</sup>

ἐν δὲ τοῖς Δημόταις

οἳ μοι, τί δρώσω σύμβολον κεχαρμένος<sup>2)</sup>;

κεκάρθαι ἔοικε τὸ ἡμισυ, ὥστε ἢ ἐκ θατέρου μόνου τετυπῶσθαι

<sup>1)</sup> Meineke: Fragm. Comic. Graecor. ed. mai. II p. 412.

<sup>2)</sup> Meineke l. l. II p. 385.



τοῦτο δεῖ τὸ νομισμάτιον νοεῖσθαι, ἢ διαιρεῖσθαι ὡς ἔχειν τὸ μέρος ἑκάτερον, τὸν τε πιπράσκοντα καὶ τὸν ὠνούμενον, ἐπὶ συμβόλῳ τοῦ μὲν τι προειληφέναι. διελέγχουσι δ' αὐτὸ σμικρὸν τι δύνασθαι Ἀριστοφάνης μὲν ἐν Ἀναγύρω λέγων

A. τοῦτ' αὐτὸ πράττω, δὴ ὀβολὸν καὶ σύμβολον  
ὑπὸ τῷ 'πικλίντρῳ. B. μῶν τις αὐτ' ἀνείλετο<sup>1)</sup>;

Ἀρχιππος δ' εἰπὼν ἐν Ἡρακλεῖ γαμοῦντι  
ἀνδρῶν ἄριστος καὶ μάλιστ' ἐμοὶ ξένος,  
ἀτὰρ παρ' ἐμοί γ' ὧν εἶχεν οὐδὲ σύμβολον.<sup>2)</sup>

Lexicographus nomen numuli interpretaturus, quem ἡμίτομον νομίσματος putat, initium capit ex Hermippeo versu *Φορμφορών*<sup>3)</sup>, in quo, ut nobis quidem traditur, nihil inest, unde pateat, numisma indicatum esse. Nam tabernarii non solum monetam possunt dare, sed etiam, si discordiis civitas distrahitur, principes factionis esse assectatoribusque suis quasi tesseram edere. Tum scriptor versu *Δημοτῶν* allato, qui significationem „ἡμίτομον νομίσματος“ explicet, explanare vult, quis sit „σύμβολον κεκαρμένος“. Nec pro auctoritate haec explanatio nobis habenda est. Accedit quod etiam allatis Aristophanis et Archippi versibus non cogimur, ut Polluci adsentiamur. Ille enim poeta, etsi propter paucitatem verborum exploratum vix quidquam habemus, videtur haec dicere: sub reclinatorio<sup>4)</sup> et duo oboli sunt et tessera contionalis, quae tantidem aestimanda est, nempe civibus, qui contionibus intersunt. Sensus autem versuum fabulae, cui *Ἡρακλῆς γαμῶν* inscribitur, in propatulo est: quamquam familiarissimus mihi hospes est, tamen, quotiescunque me visitabat, ne tesseram quidem hospitalitatis habebat. Plerumque enim hospites proficiscentes tesseram acceperunt, qua dimidiata hospites postea sese recognoscere soliti sunt. Hanc consuetudinem, quam Plato<sup>5)</sup> aliique scriptores<sup>6)</sup> saepius commemoraverunt, illis versibus Archippeis tangi Pollucem fugit, qui in numismate suo excogitato perseverans id cum vocabulo tesserae hospitalitatis permiscuit. Itaque censet, σύμβολον κεκαρμένον hominem quendam appellari, quod σύμβολον βραχὺ νόμισμα ἢ ἡμίτομον νομίσματος sit, et pergit: κεκάρθαι

<sup>1)</sup> Meineke l. l. II p. 964.

<sup>2)</sup> Meineke l. l. II p. 716.

<sup>3)</sup> De tempore, quo haec fabula acta sit, deque eius argumento v. Meineke l. l. I p. 91 sq.

<sup>4)</sup> De significatione et usu vocabulorum ἐπικλίντριον et ἀνακλίντριον v. Lobeck. ad Phrynich. p. 131 sq.

<sup>5)</sup> Plato Conviv. p. 191d.

<sup>6)</sup> cf. Schol. Eurip. Med. v. 600: σύμβολα] οἱ ἐπιξενούμενοί τισιν ἀστράγαλον κατατέμνοντες, θάτερον μὲν αὐτοὶ κατεῖχον μέρος κατελύμπανον τοῖς ὑποδεξαμένοις, ἕνα, εἰ δέοι πάλιν αὐτοὺς ἢ τοὺς ἐκείνων ἐπιξενοῦσθαι ἀλλήλους, ἐπαγόμενοι τὸ ἡμισυ ἀστραγάλιον ἀνανεοῖντο τὴν ξενίαν.

ᾤοικε τὸ ἥμισυ ὥστε ἢ ἐκ θατέρου μόνου τετυπῶσθαι τοῦτο δεῖ τὸ νομισμάτιον νοεῖσθαι. Ac Gardnerus, qui nuper admodum hunc locum tractavit, alteri illi explicationis argumento: ἢ διαρριεῖσθαι ὡς ἔχειν τὸ μέρος ἐκάτερον sqq. omnem fidem non derogat, quum Britannii nostrae aetatis nonnunquam eodem, ut ita dicam, syngrapharum genere utantur.<sup>1)</sup> Sed utut res se habet, id quidem videtur constare, *σύνβολον* nomen numarium non fuisse. Ac ultro *συνβόλαιον* hac in re disputanda nobis se offert, quod locationes et pecuniam fenore collocatam significat, velut his ex verbis Demosthenis colligitur (c. Aphob. I 27): *ἔτι τοίνυν οὐκ ἄπορος ἦν ὁ Μοιριάδης οὐδ' ἦν τῶ πατρὶ τοῦτο τὸ συνβόλαιον εἰς τάνδρόαποδα ἡλιθίως συμβεβλημένον, μερίστω τεκμηρίῳ γνώσεσθε· λαβὼν γὰρ ἑὸς αὐτὸν Ἄφοβος τοῦτο τὸ ἐργαστήριον, καὶ δέον αὐτὸν εἰ καὶ τις ἄλλος ἐβούλετο εἰς ταῦτα συμβάλλειν, τοῦτον διακωλύειν, ἐπίτροπόν γ' ὄντα, αὐτὸς ἐπὶ τούτοις τοῖς ἀνδραπόδοις τῶ Μοιριάδῃ πενταχοσίας δραχμὰς ἐδάνεισεν.* Quodsi Pollux huius vocabuli memor fuit et versus illos *Φορμοφόρων, Ἀναγύρων, Ἡρακλέους γαμοῦντος* percucurrit, adduci potuit, ut falsam eis vim subderet.

## B. Quae a Graecis de typis numorum tradita sint.

Quum igitur hactenus nomina numaria percensuerimus et quae Graeci in moneta tractanda ab aliis didicerint, quae ipsis eis propria fuerint, examinaverimus, et eos ipsos signa ad deos rettulisse cognoverimus, nunc operae videtur pretium esse anquirere, quae tandem scriptores Graecorum de his typis tradiderint. Neque tamen omnia afferemus, quae huc pertineant, sed ea potissimum, quae ad numismata spectant, usque ad exitum fere quarti a. Ch. saeculi cusa, ut haec commentationis pars congruat cum posteriore, quae numos eiusdem spatii temporum complectetur.

Tria sunt genera testimoniorum distinguenda, prout aut signa enumerantur, aut qua de causa adhibita sint narratur, aut vulgaria numorum nomina referuntur.

## I. Signorum catalogi.

Atque insignium quidem Pollux plura profert, qui dicit Iasios puero equo insidente, Aspendios binis hominibus luctantibus, Dardanios gallis certantibus notavisse.<sup>2)</sup> Quarum

<sup>1)</sup> Num. Chron. 1881 p. 281 sqq.: Pollux, account of ancient coins.

<sup>2)</sup> Poll. IX 84 sq.: οὐ γὰρ ἀξιώσει τις ἡμᾶς ἐν τῇ παρόντι πολυπραγμονεῖν, εἰ Μυτιληναῖοι μὲν Σαπφῶ τῷ νομίσματι ἐνεγάραττον, Χῖοι δὲ Ὀμηρον, Ἰασεῖς δὲ παῖδα δελφῖνι ἐποχοῦμενον, Δαρδανεῖς δὲ ἄλεχτρούωνων μάχην, Ἀσπένδιοι δὲ παλαιστάς, καὶ Ὑγῖνοι μὲν λαγῶν, Κεφαλλῆνες δὲ ἵππων, Θάσσιοι δὲ Πέρσῃν, Ἀργεῖοι δὲ μῦν. De Rheginis infra agendum erit.

urbium si omnes numos perlustramus. statim apparet, hos typos neque solos et frequentissimos esse, ut concludere liceat, auctori id tantum curae fuisse, ut eos commemoraret, qui praecipui peculiaresque fuissent. Nec alia de causa ad νοῦμον Aristotelem secutus annotat, huic numismati apud Tarentinos signum Tarantis delphino invehentis fuisse.<sup>1)</sup> Sin autem Θῖαια et Mytilenaeae monetae tantummodo effigiem Homeri et Sapphus tangit, utramque manifesto elegit, quod magis mentione digna esset, quam sphinx et caput vitulinum Apollinisque imago, quae multo saepius hic inveniuntur. Semper eo tendit, ut ante oculos ponat, quae ob aliquam causam animadvertenda videantur.

Sed fides, quam adhuc verbis Pollucis, ut par erat, tribuimus aliquantulum infringitur, cum legimus, Thasiis Persae, Argivis muris, Cephallenibus equi insigne fuisse. Nam nonnullis Thasiorum numismatis inscriptis satis illustratur, sagittarium eorum, saepenumero repraesentatum, Herculem esse. Ac quomodo auctor hunc in errorem inciderit, iam Eckhelius indicavit<sup>2)</sup>: quum Plinius tradidisset<sup>3)</sup>, Persen, Persei filium, homines sagittandi artem docuisse, fieri potuit ut ille, nominis imagini adiecti nescius huiusque narratiunculae recordatus, sibi persuaderet, eundem heroa etiam hic impressum esse. Huc Gardnerus prope accedit, qui censet, ex scriptura librorum (Πέρσην) tantummodo sagittarium aliquem Persarum, non Persen ipsum intellegendum esse, quandoquidem numi Persarum a typo nomen τοξοτῶν assecuti essent.<sup>4)</sup> Certe probabilius id est quam Dindorfii opinio, qui Πέρσην corruptum esse conicit et Ἡρακλῆν restituere vult. Quamquam igitur hoc peccatum Pollucis quandam excusationem habet, tamen ea, quae sequuntur, nullo modo recte sese habere possunt, quum neque Cephallenum numismata equo neque Argivorum mure signata reperiantur.

Item repellenda sunt, quae alibi de Atheniensium diobolis et tetrobolis exponuntur. Quoad enim nos compertum habemus, utrumque in anteriore parte caput Palladis perhibet, in posteriore binas noctuas et eas diobolorum unum in caput coeuntes, tetrobolorum ex adverso positas. Contra Pollux dicit, diobolis caput Jovis noctuamque, tetrobolis idem caput

<sup>1)</sup> Poll. IX 80: καὶ Ἀριστοτέλης ἐν τῇ Ταραντίνων πολιτείᾳ καλεῖσθαι φησι νόμισμα παρ' αὐτοῖς νοῦμον, ἐφ' οὗ ἐντετυπῶσθαι Τάραντα τὸν Ποσειδῶνος, δελφίνι ἐποχοῦμενον.

<sup>2)</sup> Doctrina numorum veterum II p. 53.

<sup>3)</sup> Plinius hist. nat. VII 201: arcum et sagittam Scythem Jovis filium, alii sagittas Persen, Persei filium, invenisse dicunt.

<sup>4)</sup> Num. Chron. I. I.



inasque noctuas esse.<sup>1)</sup> Ac quamquam tetrobola quidem non tam saepe in lucem prolata sunt, Polluce ad tetrobola triobolaeque am addente: „ἐν τῇ χρήσει τέτριπται“, tamen Gardnerus suo iure videtur contendere, valde abhorruisse ab Atheniensium usu, si numi argentei aliter ac Palladis capite denotati essent.

Sed praeterea alii quoque scriptores in typis describendis versati sunt, velut Hesychius et Suidas de Cyzicenis, prope-nodum notissima antiquitatis moneta haec tradiderunt: *πρόσω-τον δὲ ἦν γυναικὸς ὁ τύπος* et: *πρόσωπον δὲ ἦν γυναικεῖον ὁ τύπος, ἐπὶ δὲ θατέρου προτομὴ λέοντος*. Recta haec sunt et ipsis exemplaribus servatis affirmata.<sup>2)</sup>

Summa igitur subducta facile perspicimus, inter viros grammaticos unum Pollucem sibi proposuisse, ut insignia componeret, quae quibusdam de causis negligenda non esse putabat; alii ea animadverterunt, si forte in ea incurrebant. Praeterea etiam Aristoteles in libris, quibus *πολιτεῖαι* inscriptum erat, hanc rem videtur non praeterisse, id quod eis, quae sequuntur, magis illustrabitur.

## II. Qua de causa typi adhibiti sint exponitur.

Saepius occasio erat data, ut causae notarum vel significationes repraesentationum explanarentur. Ac primum quidem plura de vetustissimis Atheniensium „bovibus“ accepimus, quae semel atque iterum tractata tamen etiamnunc magnas movent dubitationes. Multorum testimoniorum, quibus his de numismatis refertur, tria iam proferamus, quae maxime videntur memorabilia esse: Pollux, Schol. ad Iliad., Plutarchus. Pollux quidem narrat (IX 60 sqq.): *τὸ παλαιὸν δὲ τοῦτ' ἦν* (sc. *τὸ δίδραχμον*) *Ἀθηναίοις νόμισμα, καὶ ἐκαλεῖτο βοῦς, ὅτι βοῦν εἶχεν ἐντετυπωμένον· εἰδέναι δ' αὐτὸ καὶ Ὅμηρον νομίζουσιν εἰπόντα „ἐκατόμβοι ἐννεαβοίων“. καὶ μὴν καὶ τοῖς Δράκοντος νόμοις ἔστιν ἀποτίνειν εἰκοσάβοιον· καὶ ἐν τῇ παρὰ Ἀηλίῳ θεωρίᾳ τὸν κήρυκα κηρύττειν φασίν, ὁπότε δωρεὰ τινι δίδοται, ὅτι βοῦς τοσοῦτοι δο-θήσονται αὐτῷ, καὶ δίδοσθαι καθ' ἕκαστον βοῦν δύο δραχμάς Ἀττικὰς· ὅθεν ἔνιοι Ἀηλίῳ ἀλλ' οὐκ Ἀθηναίων νόμισμα εἶναι ἰδίον τὸν βοῦν νομίζουσιν.* — In Schol. ad Iliad. XXI 79 cod. Ven. B. legitur: *ἐκατόμβοιον· οἱ παλαιοί, πρὶν ἐπινοηθῆναι τὰ νομίσματα τὴν συναλλαγὴν ποιοῦντο διὰ τῶν τετραπόδων· ὅθεν ὕστερον ἐφευρεθέντων τῶν νομισμάτων βοῦν ἐπ' αὐτῶν ἐξέτύπουν, ἐνδεκνύμενοι τὸ ἀρχαῖον ἔθος, καὶ παροιμία, βοῦν ἐπὶ γλώσσης,*

<sup>1)</sup> Poll. IX 62 sq.: *ἦν δὲ καὶ τριώβολον καὶ διώβολον εἰδη νομισμάτων Ἀττικῶν, τὸ μὲν διώβολον ἔχον ἐντετυπωμένην γλαῦκα καὶ ἔκ θατέρου πρόσωπον Διός, τὸ τετρώβολον τὸ μὲν πρόσωπον ὁμοίως, δύο δὲ τὰς γλαῦκας.*

<sup>2)</sup> cf. Brandis l. l. p. 312.

ὅ ἐστι νομίσματα. ὁρμύζειν δὲ ἡ παρομμία αὐτῇ ἐπὶ τῶν ῥητόρων τῶν λαμβανόντων νομίσματα ὑπὲρ τοῦ μὴ συγκατηγορεῖσθαι τινος ἀλλὰ σωπῆσαι.<sup>1)</sup> Plutarchus hac ratiocinatione utitur (Thes. c. 25, 5 sq.): ἔκοψε (Θησεύς) δὲ καὶ νόμισμα βοῶν ἐγχαραῖξας, ἥ διὰ τὸν Μαραθῶνα ταῦρον, ἥ διὰ τὸν Μένω στρατηγόν, ἥ πρὸς γεωργίαν τοὺς πολίτας παρακαλῶν· ἀπ' ἐκεῖνον δὲ φασὶ τὸ ἐκατόμβιον καὶ τὸ δεκάβοιον ὀνομασθῆναι.<sup>2)</sup>

Has interpretationes a Boeckhio magis minusve approbatas<sup>3)</sup>, complures aliorum virorum eruditorum falsas esse arbitrati sunt,<sup>4)</sup> quum praesertim nullum eiusmodi exemplar usque ad hos dies permansisset, quod certo iudicio Atheniensibus attribuendum esset.<sup>5)</sup> Quum autem hoc per se non sufficiat, accurate examinare debemus, quae a veteribus tradita sint.

Ac statim apparet. omnibus his locis βοῶς tamquam monetam vetustam commemorari; quando ea formata et quomobrem impressum sit signum, dissentiunt scriptores et suas proferunt opiniones, quae nobis quidem pro auctoritate habendae non sunt. Sollemnis ille ritus Deliacorum praeconum solum est testimonium ac, ut ita dicam, certissimum documentum, olim bovem dictum esse, quod tantidem ac didrachmum Atticum aestimaretur. Praesto est coniectura, id didrachmum fuisse ipsum, quae eo etiam probabilior redditur, quod illud nomen vel cum didrachmis coniunctum est, quoniam nemo ignorat, haec Atheniensium, quum ferire coepissent, notissima fuisse numismata. Nam Euboicis hoc numorum genus usitatissimum fuit, nec quisquam fere dubitat, quin tota Atheniensium res numaria ad illos tamquam magistros revocanda sit.

At ex institutis prioris aevi explicatio βοῶν sumenda est: Graeci quum pecudes permutare desinerent, memoria pristini moris servata numum bovi ad pretium parem hoc nomine appellarunt. Concedo, sed miror, cur nullum numisma aliarum bestiarum nomen acceperit, quae aequae solvendo inserviverunt. Et alterum accedit, quod huic suspicioni vehementer repugnat: Demetrio Phalereo teste Solo eis, qui lupum aut catulum lupi occidissent, quinque drachmas aut unam praemia constituerat,

<sup>1)</sup> cf. Schol. ad Arist. Av. 1106: ἡ γλαῦξ ἐπὶ χαράγματος ἦν τετραδράχμων, ὡς Φιλόχορος . . . ἐκλήθη δὲ τὸ νομισμα τὸ τετραδράχμων τότε γλαῦξ. ἦν γὰρ γλαῦξ ἐπίσημον καὶ πρόσωπον Ἀθηνᾶς, τῶν προτέρων διδράχμων ὄντων ἐπίσημον δὲ βοῶν ἐχόντων. In medio relinquendum est, num ea, quae de didrachmo afferuntur, aequae ex Philochoro hausta sint.

<sup>2)</sup> De aliis antiquorum auctoribus qui hanc rem tractaverunt cf. Paroemiogr. Gr. ed. Lentsch et Schneidewin t. I p. 51 n. (Zenob. II 70).

<sup>3)</sup> Metrol. Untersuch. p. 121.

<sup>4)</sup> Beulé: Les monnaies d'Athènes p. 9. Lenormant: La monnaie dans l'antiquité I p. 76 sq. Hultsch: l. l. p. 199 sq. 207.

<sup>5)</sup> Num. Chron. 1873 p. 177 sqq. (Gardner).

quae bovis sive ovis pretio responderent.<sup>1)</sup> Si aetate huius legumlatoris bos quinque drachmas valuit, qui fit, ut *διδραχμον* i. e. duae drachmae tantidem putatae sint? Nequicquam operam navaret, qui hanc rem planam facturum esset, ac nulla obvenit alia ratio, cur numisma illud Atheniensium ita vocatum sit, nisi ei bovis fuit insigne. Etenim res si aliter se haberet, nec adagium illud „*βοῦς ἐπὶ γλώσσης*“, nec Aeschylei ille Agamemnonis versus (36.):

*τὰ δ' ἄλλα σιγῶ, βοῦς ἐπὶ γλώσση μέγας  
βέβηκεν*

intellegenda essent. Utrumque eandem habet originem. Nam quod nonnulli viri docti, poetam nonnisi gravi superlative usum esse, opinati Menandri versum

*παχὺς γὰρ ὅς ἔχειτ' ἐπὶ στόμα*

attulerunt, qui idem fere tangeret, Meinekeus<sup>2)</sup> iam et Godofr. Hermannus in adn. ad Agam. vers. 36 eorum opinionem reiecerunt, quorum hic sic scribit: „Id in Dionysium Heracleae tyrannum, obesissimi corporis hominem, sic dictum est, ut per illum impositam esse silendi necessitatem appareat“. Tametsi igitur huic Aeschyleo versui vulgaris ille sensus deest „*εἴ τις ἐπ' ἀργυρίῳ σιωπῇ*“ i. e. si quis mercede corruptus silentio tegit, quae ei ignota non sunt, ac custos metu potius obstringitur, ne plura efferat, spectatores illum versum audientes sine dubio tritissimi proverbii meminerunt. Expedita erat ea translatio ad alias res ac usus sermonis initio complexus est, nec Philostrati verba quidquam offensionis habent, qui de Pythagora dicit (Vit. Soph. Apoll. II 11 p. 241): *γλῶττάν τε ὥς πρῶτος ἀνθρώπων ξυνέσχε, βούν ἐπ' αὐτῇ σιωπῆς εὐρὼν δόγμα*. Ac aliud est Peloponnesiorum adagium, quod huic Atheniensium aptissime congruit itemque a numo ductum est: *τὰν ἀρετὰν καὶ τὰν σοφίαν νικᾶντι χελῶναι*.<sup>3)</sup>

Sed quanam fuit origo typi? Athenienses Palladem venerantes eique numos censecrantes principio bove notaverunt? Facillime res enodatur. Curtius enim coniecit, antiqua illa numismata, quondam in Attica reperta varieque insignita, non Atheniensi at Euboica esse,<sup>4)</sup> qua in opinione assensum habet quum aliorum tum Imhoofi-Blumeri,<sup>5)</sup> qui dicit, etiam

<sup>1)</sup> Plut. Sol. c. 23: *εἰς μὲν γε τὰ τιμήματα τῶν θυσῶν λογίζεται (Σόλων) πρόβατον καὶ δραχμὴν ἀντὶ μεδύμνου. λύκον δὲ τῷ κομίσαντι πέντε δραχμάς ἔδωκε, λυκιδέα δὲ μίαν, ὧν φησιν ὁ Φαλληρεὺς Δημήτριως, τὸ μὲν βοὸς εἶναι, τὸ δὲ προβάτου τιμὴν.*

<sup>2)</sup> Menandri et Philemonis reliquiae p. 10 sq.

<sup>3)</sup> Pollux IX. 74.

<sup>4)</sup> Hermes X 225 sqq.

<sup>5)</sup> Abhandl. d. Berl. Akad. d. W. 1881 p. 656.

in Sicilia multos *στατῆρας* protractos esse, qui Corinthiorum<sup>1)</sup> denotati non Syracusanis solum sed etiam aliis Graecorum urbibus adscribendi essent, quum hanc in insulam Graeci ad commercium faciendum undique convenissent. Ac profecto et rota et equus, duo ex typis illorum exemplarium, Euboica moneta perhibentur.<sup>1)</sup> Nec fortuito Euboicorum numi in Atticam delati sunt, sed multis mercaturae rebus Athenienses eis ac praesertim Eretriensibus annexi erant: hinc scientiam rei numariae didicerunt. Itaque si bos Eretriensium typus est, si Athenienses *διδραχμα* boves nominant, veri non tam dissimile est, hos ab illis insigne suum assumpsisse. Temeraria quidem videtur haec coniectura, sed exempla non deficient: Thasii commercii causa quaedam suorum numismatum ad morem finitimarum gentium Thraciarum pensaverunt et signaverunt;<sup>2)</sup> Alexander primus, rex Macedonum, postquam Bisaltos sibi subegit ad eorum monetam rettulit suam eorumque typum usurpavit;<sup>3)</sup> Persae Lydis devictis aliquamdiu Sardianorum leone numos suos notaverunt;<sup>4)</sup> *χελῶναι* non modo Aegineticae sed omnino Peloponnesiacaе fuerunt.<sup>5)</sup> Nec aliam habet originem, si eandem formam quadrati incusi in urbibus vel apud gentes servatam persentimus, quae antea aliquo vinculo adstrictae fuerunt ad eos, qui primum id adhibuerunt; velut Aegineticum quadratum incusum in moneta Naxiorum et Orohomeniorum aliorumque Boeotiorum invenitur,<sup>6)</sup> Teium in moneta Abderitarum, Orresciorum, Edonorum, Bisaltorum, Macedonum aevi Alexandri primi.<sup>7)</sup> Atheniensibus ergo Euboici partitionem numismatum ac initio typum quoque dederunt.

Sed unum superest, ut exploremus, quo modo Delii idem didrachmorum genus acceperint. Ac notum est, Athenienses ludos Deliacos et Pisistrato tyranno et belli Peloponnesiaci aetate denuo constituisse maioremque ad dignitatem perduxisse, i. e. postquam Pisistratus iterum Athenas redierat (ao. 541 a. Ch.) et anno quadringentesimo vicesimo

<sup>1)</sup> cf. Num. Chron. 1875 p. 279. Quam ob causam Gardnerus signum effigiei Gorgoneae antiquae Atheniensium monetae derogat, equidem non video.

<sup>2)</sup> Brandis l. l. p. 209. 507.

<sup>3)</sup> Brandis l. l. p. 211. Imhoof-Blumer: Monnaies grecques p. 82. Herod. V 17.

<sup>4)</sup> Soutzo l. l. p. 13. 15.

<sup>5)</sup> Pollux IX 74: καὶ μὴν τὸ Πελοποννησίων νόμισμα χελώνην τινὲς ἤξιον καλεῖν ἀπὸ τοῦ τυπώματος. Hesych. s. r. χελώνη τὸ ὑποπόδιον. καὶ νόμισμα Πελοπονησιακόν. cf. Eckhel l. l. II. p. 228 sq.

<sup>6)</sup> Num. Chron. 1881 p. 185.

<sup>7)</sup> Brandis l. l. p. 206 sq.



quinto a. Ch.<sup>1)</sup> Tunc ritus ille bovem pronunciandi nimirum natus est posteaque permansit ut institutum cultus. Nec quisquam putabit aliud ac Pisisistrati aevum hic quaeri, quia satis constat Athenienses quinto saeculo numis caput Palladis noctuamque impressisse. Adice, quod antiquissima Atheniensium numismata quae usque ad haec tempora duraverunt, prius quam medio sexto a. Ch. saeculo vix percussa sunt.<sup>2)</sup>

Scriptores iam recentiores propriae significationis βοῶν immemores, eam cum vetusta illa maiorum consuetudine coniunxerunt, qui in rebus permutandis bestiis aliisque usi sunt, et iudicaverunt, hinc signum petatum esse. Quapropter Pollux scripsit: εἰδέναι δ' αὐτὸ καὶ Ὅμηρον νομίζουσιν εἰπόντα „ἐκατόμβοι ἐννεαβοίων“ et Schol. Iliad. annotavit: ὕστερον ἐφευρεθέντων τῶν νομισμάτων βοῶν ἐπ' αὐτῶν ἐξετύπου, ἐνδείκνυμενοι τὸ ἀρχαῖον ἔθος. Alia fuit ratio Plutarchi, qui dicit Theseum omnium primum bove insignivisse. Nam quum numismata illa certae aetati attribuere vellet et persuasum haberet, ea antiquitus iam cusa esse, in Theseum incidit, qui quascunque leges Atheniensium moresque semper videbatur condidisse.<sup>3)</sup> Quid autem magis in promptu erat, quam ut originem typi ex insignibus herois facinoribus duceret et ex tauro Marathonio vineto, ex Minotauro devicto, aliis e rebus de quibus Theseus optime meritus erat, explanationem suam, credo perdoctam, hauriret.

Multo magis sunt perspicua, quae de Rheginorum typis legimus (Poll. V. 75): Ἀναξίλας ὁ Ῥηγῖνος οὖσης, ὡς Ἀριστοτέλης φησὶν, τῆς Σικελίας τέως ἀγόνου λαγῶν, ὁ δὲ εἰσαγαγὼν καὶ θρέψας, ὁμοῦ δὲ καὶ Ὀλύμπια νικήσας ἀπῆλθῃ, τῷ νομίσματι τῶν Ῥηγῖνων ἐνετύπωσεν ἀπῆλθῃ καὶ λαγῶν. Quod testimonium ne addubitemus, et ipsa Aristotelis auctoritas postulat, et Rheginorum Messaniorumque numi, ab Anaxilao tyranno cusi, impedimento sunt. Similiter Philippum, Alexandri Magni patrem, memoriam victoriae Olympicae typo numario cele-

<sup>1)</sup> Herod. I 64. Thucyd. III 104. cf. Curtius: Griech. Gesch. I<sup>4</sup> p. 345.

<sup>2)</sup> Beulé l. l. p. 29: „or ces pièces (archaïques) paraissent presque toutes postérieures à Salon, et du temps de Pisistrade et des Pisistratides“. Gardnerus (Num. Chron. 1875 p. 279 not.) vetustissima exemplaria aetati Solonis adscribit; aliter Imhoofus-Blumerus exposuit (l. l.).

<sup>3)</sup> Haud ita multo abhorret, si Aristophanes facete Herculem facit dicentem, Theseum etiam apud inferos id constituisse, ut, qui Styga transferri vellent, duos obolos nautae solverent (Ran. 138 sqq.):

Δ. εἴτα πῶς περαιωθήσομαι;

HP. εὐπλοιαρίῳ τυννόντωί σ' ἀνὴρ γέρον  
ναύτης διάξει δὴ ὁβολὴ μισθὸν λαβὼν.

Δ. φεῦ ὡς μέγα δύνασθον πανταχοῦ τῷ δὴ ὁβολῷ.  
πῶς ἡλθέτην ἐκείσε; HP. Θησεὺς ἤγαγεν.

brasse, Plutarchus tradit (Alex. c. 4): οὐτε γὰρ ἀπὸ παντὸς οὐτε πᾶσαν ἡγάπα (sc. Ἀλέξανδρος) δόξαν, ὡς Φίλιππος λόγον τε δεινότητι σοφιστικῶς καλλωπιζόμενος καὶ τὰς ἐν Ὀλυμπίᾳ νίκας τῶν ἁρμάτων ἐγγαράττων τοῖς νομίμασιν, ἀλλὰ... et aurei regis στατήρες confirmant quorum posterior pars bigam exhibet.<sup>1)</sup>

His adiungamus Luciani de Sidonia moneta verba (περὶ τῆς Συρίας θεοῦ c. 4): τὸ νόμισμα τῷ Σιδωνίῳ χρέονται τὴν Εὐρώπην ἐφεξομένην ἔχει τῷ ταύρῳ τῷ Δί, quae numismatis huius urbis liquido confirmantur.<sup>2)</sup>

Nec minorem habent fidem, quae de signis Samiorum apud Suidam proferuntur. Suid. s. v. Σαμίῳν ὁ δῆμος. οἱ δὲ ὅτι Ἀθηναῖοι μὲν τοὺς ληφθέντας ἐν πολέμῳ Σαμίους ἔστιζον γλαυκί, Σάμιοι δὲ τῇ σαμαίνῃ . . . ἔστι πλοῖον δίχροτον, ὑπὸ Πολυχράτους πρῶτον κατασκευασθὲν τοῦ Σαμίῳν τυράννου ὡς Ἀυσίμαχος ἐν δευτέρῳ Νόστων. τὸ δὲ πλάσμα Δούριδος. οἱ δὲ τὴν σάμειναν νόμισμα εἶναι. Quod autem ad formam σαμαίνης attinet, quae in numis iam priscae aetatis incisa est, Plutarchus eam accuratius descripsit (Pericl. c. 26): ἡ δὲ σάμεινα ναῦς ἐστὶν ὑπόπρωρος μὲν τὸ σίμωμα, κοιλοτέρα δὲ καὶ γαστροειδής, ὥστε καὶ φορτοφορεῖν καὶ ταχυναντεῖν.<sup>3)</sup>

Copiosior est, quam Aelianus de insigni Iasiorum asser-  
vavit memoriam (de nat. anim. VI. 15): Gymnasium Iasiorum  
prope litus erat, ut adolescentes, palaestri exercitationibus  
defatigati, statim in fluctibus lavarentur seseque reficerent.  
Unum ex iis, pulchritudine excellentem, delphinus aliquis  
adamat, ac dorso ultro praebito in altum eum, quoad hic  
vult, evehit et in oram reportat. Quotidie ad horam praesto  
est. Sed aliquando puer amatus nimis fessus in delphinum  
se praecipitat neque animadvertit, aculeum tergi erectum  
esse; umbilico transfixo e vita excedit: καὶ πῶς ἐτυχεν ἡ τοῦ  
ζώου ἄκανθα ἥ κατὰ τοῦ νέου ὀρθή οὖσα, καὶ τῷ ὥραίῳ τὸν  
ὀμφαλὸν κεντεῖ. Delphinus autem, quia onus magis magisque  
leviter incubat undaeque cruentum colorem ducunt, persentit,  
adolescentulum animam efflavisse, et summo dolore affectus,  
quum ipse interempto superesse nolit, maxima cum celeritate  
in litus adnatat, ut ex vehementi impulsu mortem accipiat:

<sup>1)</sup> cf. Transact. Roy. Soc. Litt. X 427 sqq.: Reginald Poole, The use of the coins of Kamarina in illustration of the fourth and fifth Olympiam odes of Pindar. p. 429

<sup>2)</sup> Leake: Num. Hellen. As. Gr. p. 114.

<sup>3)</sup> cf. Herod. III 59: καὶ τῶν νηῶν καπρίους ἐχουσέων τὰς πρώρας ἡρωτηρίασαν (οἱ Αἰγυναῖοι) καὶ ἀνέθεσαν ἐς τὸ ἱερὸν τῆς Ἀθηναίης ἐν Αἰγίνῃ. — Graser: de veterum re navali. Berol. 1864. id: Die ältesten Schiffs-darstellungen auf antik. Münzen. Berol. 1870.

ἀμειβόμενοι δὲ Ἰασεῖς τὴν φιλίαν ἐκείνων ἰσχυράν, ἀπέφηναν τάφον κοινὸν ὠραίῳ μειρακίου καὶ ἀελφίνος ἐρωτικοῦ, καὶ στήλην ἐπέστησαν . . . καλῶς παῖς ἱππεύων ἐπὶ ἀελφίνος ἦν καὶ νόμισμα δὲ ἀργύρου καὶ χαλκοῦ εἰργάσαντο, καὶ ἐνέθλασαν σημεῖον τὸ ἀμφοῖν πάθος. Hac ab narratiuncula paullulum abhorrent, quae de eodem puero apud Plinium leguntur (IX. 8, 27 ed. Sill.): „ante haec similia de puero in Iaso urbe memorantur cuius amore spectatus longo tempore, dum abeuntem in litus avide sequitur, in harenam invectus exspiravit; puerum Alexander magnus Babylone Neptunio sacerdotis praefecit amorem illum numinis propitii fuisse interpretatus“. Quamquam apparet Iasios eiusmodi fabellam, similiter aliis quoque locis narratam,<sup>1)</sup> cum typo numario connexuisse. Signum quidem ipsum, cui cum puero illo vix quidquam rei est, videtur ad cultum Apollinis Delphini referendum esse.

Non pauca denique de Tenediorum nota numaria tradita sunt. Nomen quidem insulae a Tene rege originem ducit. Hic, Cycni Troadis regis filius, a noverca in suspicionem vocatus, per vim eam se stupraturum fuisse, una cum sorore, cui illa aequae insidias parabat, arcae inclusus et in mare eiectus est. Ad Leucophrym insulam appulsi<sup>1)</sup> benigne ab incolis recepti sunt, qui paullulum post Tenem creaverunt regem seseque Tenedios ab eo nominaverunt.<sup>2)</sup> Hic sicut Theseus cum primitiis patriae monetae connexus ex quodam memorabili sui regni evento fictus est typos petivisse, quibus alii alium sensum subdiderunt. Ac primum Stephani Byzantii verba apponamus (s. v. *Τένεδος*): ἔστι καὶ ἑτέρα παροιμία, Τενέδιος πέλεκυς, ἐπὶ τῶν ἤτοι πικρῶς ἢ καὶ μᾶλλον συντόμως ἀποκοπόντων τὰ ζητήματα καὶ τὰ ἄλλα πράγματα. καὶ φησιν Ἀριστέδης καὶ ἄλλοι τὸν ἐν Τενέδῳ Ἀπόλλωνα πέλεκυν κρατεῖν διὰ τὰ συμβάντα τοῖς περὶ Τένην. ἢ μᾶλλον ὥς φησιν Ἀριστοτέλης ἐν τῇ Τενεδίων πολιτείᾳ, ὅτι βασιλεὺς τις ἐν Τενέδῳ νόμον ἔθηκε, τὸν καταλαμβάνοντα μοιχοὺς ἀναιρεῖν πελέκει ἀμφοτέρους. ἐπειδὴ δὲ συνέβη τὸν υἱὸν αὐτοῦ καταληφθῆναι μοιχόν, ἐκύρωσε καὶ περὶ τοῦ ἰδίου παιδὸς τηρηθῆναι τὸν νόμον, καὶ ἀναιρεθέντος εἰς παροιμίαν παρῆλθε τὸ πρᾶγμα ἐπὶ τῶν ὡμῶς πραττομένων. Διὰ τοῦτό φησι καὶ ἐπὶ τοῦ νομίσματος τῶν Τενεδίων κεχαράχθαι ἐν μὲν τῷ ἑτέρῳ μέρει πέλεκυν, ἐπὶ δὲ τοῦ ἑτέρου δύο κεφαλὰς εἰς ὑπόμνησιν τοῦ περὶ τὸν παῖδα παθήματος. Haec Suidas (s. v. *Τενέδιος ξυνήγορος*) partim testatur partim uberius

<sup>1)</sup> De aliis huius generis fabellis cf. Wernicke: De Pansaniae Periegetae studiis Herodoteis. Berol. 1884 p. 103 sq. (epim. II).

<sup>2)</sup> Heraclid. Pont. in Frgm. Hist. Gr. II p. 213. Plutarch Quaest. Graec. c. 28.



tractat: καὶ παροιμία Τενέδιος πέλεκς. Ἀριστοτέλης μέντοι, ὅτι βασιλεὺς Τενέδιος μετὰ πελέκεως δικάζων τὸν ἀδικοῦντα εὐθέως ἀνῆρει. ἢ ὅτι Ἀσσερίνα τόπος ἐν Τενέδῳ, ἔνθα ποταμίσκος, ἐν ᾧ καρκῖνοι τὰ χελώνια διηρθρωμένα ἐπὶ πλεῖον ἔχοντες καὶ πελέκει ἐμφερῇ· ἢ ὅτι βασιλεὺς τις νόμον θεῖς, πελέκει τοὺς μοιχοὺς ἄμφω καρατομεῖν, καὶ ἐπὶ τοῦ υἱοῦ ἐτήρησε τοῦτο. καθ' ὃ καὶ ἐν τῇ νομίσματι ἐφ' οὗ μὲν πέλεκς, ἐφ' οὗ δὲ δύο πρόσωπα ἐξ ἐνὸς ἀγένης.<sup>1)</sup> Tres igitur explicationes habemus, unam Aristotelis, aliam Aristidis, aliam ut opinor vulgarem. Aristoteli quidem ansam dedit proverbialis illa elocutio, qua quis significatur, qui perceleres perque acerbis capit poenas. Quum persuasum haberet, exordium adagii et typorum idem esse, ac memoriam legis novisset, qua Tenes adulterium vetuisse ferebatur, nimirum hanc legem, cuius auctorem in medio relinquit, quasi fundamentum utriusque putavit. Quamquam hanc praeclari philosophi interpretationem non comprobabimus, tamen pluris eam aestimabimus, quam aliam illam, quae bipennem numorum ex peculiari forma testarum quorundam cancrorum vult tractam esse. Multo vero propius videtur Aristides rebus veris accedere opinatus hoc insigne cum Apolline cohaerere. Namque in cultu imprimis Asiaticarum gentium bipennis obvenit ac potissimum Carum, qui Iovi eam attribuerunt;<sup>2)</sup> praeterea Thracum Lycurgo ea dari solet.<sup>3)</sup> Ac si multi viri docti probaverunt, hanc deorum notam ad priscam quandam victimas immolandi consuetudinem spectare.<sup>4)</sup> Aelianus similia de Tenediis asservavit, quos dicit vitulum vaccae, Baccho dedicatae, cothurno exornasse deoque sacrificasse, deinde sacerdotem, qui eum interfecisset, lapidibus iactantes ad litus prosecutos esse.<sup>5)</sup> Quod enim Baccho ea sollemnia fiebant, ad hunc typum non multum interest, quandoquidem alibi quoque Bacchus et Apollo religione Graecorum artissime connectebantur.<sup>6)</sup> Itaque huc videtur referenda esse bipennis numorum; certe ex adagio illo petita non est.<sup>7)</sup>

<sup>1)</sup> cf. praeterea Plutarch. de Pyth. orac. c. 12: καὶ Τενέδιοι τὸν πέλεκυν (sc. ἀναθεῖναι λέγονται) ἀπὸ τῶν καρκίνων τῶν γινομένων περὶ τὸ καλούμενον Ἀσσερίον παρ' αὐτοῖς· μόνοι γὰρ, ὡς ἔοικεν, ἐν τῷ χελωνίῳ τύπον πελέκεως ἔχουσι.

<sup>2)</sup> Preller: Griech. Mythol. I p. 112 n. 2.

<sup>3)</sup> Compte Rendu 1863 p. 130 sqq. Archäol. Zeitg. 1869 p. 53 sqq. 1872 p. 66 sqq.

<sup>4)</sup> Welcker: Griech. Götterl. I p. 444. Schömann: Griech. Altertüm. I p. 245. 253. Gardner: The types of Greek coins p. 70.

<sup>5)</sup> Aelian. de nat. anim. XII c. 34.

<sup>6)</sup> cf. Gardner l. l. p. 175.

<sup>7)</sup> Similiter saepius narratur legumlatores ipsos suarum legum poenis affectos esse. Unum tantummodo Charondam proferamus, qui constituisse dicitur, ut nemini liceret armatum contionibus interesse. Itaque ipse, quum

Nec secus pro auctoritate habendum est, quod Aristoteles ancipitem alterius partis faciem indidem ducit. Saepius enim eiusmodi effigies moneta Asiaticorum et Thracum perhibentur. quas deos repraesentare nemini fere dubium videtur. Suo igitur iure Leakeus<sup>1)</sup> Eckhelio repugnat, qui antiquos scriptores secutus Tenem Hemitheamque effectos esse censuerat,<sup>2)</sup> ac summa cum probabilitate hic Iovem et Iunonem cognoscendos esse suspicatur: „for one of the heads bears precisely the character of a Jupiter, and the other, though of inelegant design, and too masculine, was intended probably for a Juno“ Similia Gardnerus nuper disseruit.<sup>3)</sup> Quae si ita sunt, apparet Tenediis Iovem et Iunonem. Apollinem et Bacchum cultu coniunctos fuisse. Sed quaeritur, qui factum sit, ut narratio illa de testis cancrorum oriretur. Ac facile, etsi compertum nihil habemus, conici potest, has bestias Apollini sacras fuisse, eamque ob causam typum numarium ab eo, qui sibi persuasisset cum deis insignia numorum cohaerere, testae huius peculiaris ope explicatum esse. Nam quum commenticia et vana haec memoria omnino non videatur, statim unicuique in mentem venit, cancos aliis quoque locis immortalibus attributos ideoque in numismatis insculptos esse.<sup>4)</sup>

### III. Nomina vulgaria.

Restat, ut de vulgaribus quorundam numorum nominibus agamus, quae typis eorum debita, prout moneta urbium *αὐτονόμων* aut regum est, ab insignibus illarum aut ab imaginibus nominibusque horum petita sunt. Ac Saminorum *σαμαίναις* et Atheniensium *βουσί*, quae supra iam tetigimus, hoc loco praetermissis statim ad *γλαῦχας* Atheniensium accedamus. Quum ex Philochori verbis antea ascriptis tetradrachma sic appellata esse cognoverimus,<sup>5)</sup> pauca iam exempla huius usus sermonis afferamus. Arist. Aves 1106:

*γλαῦχες ὑμᾶς οὐποτ' ἐκλείψουσι Λαυριωτικαί*

et Plut. Lys. v. 16: *φράζει θεράπων τοῦ Γυλίππου πρὸς αὐτοὺς* (sc. τοὺς ἐφόρους) *αἰνιξάμενος ὑπὸ τῷ κεραμεικῷ κοιτάζεσθαι*

quando rure reversus, gladio non exuto, ad cives convocatos adiret et suam legem violare insimularetur, respondens „immo vero eam confirmabo“ manus sibi intulit. Diodor. XII 19. Alia eiusmodi nuper Dunckerus contulit: Sitzungsber. der Berl. Akad. d. W. 1883 p. 946.

<sup>1)</sup> Numism. Hellen. Ins. Gr. p. 43.

<sup>2)</sup> Doctrina num. veter. II p. 489.

<sup>3)</sup> Types p. 175, t. X 43.

<sup>4)</sup> cf. imprimis Coorum notam numariam, de qua alio tempore agam.

<sup>5)</sup> v. supra p. 20 n. 1.

πολλὰς γλαῦκας. Quod nomen ad noctuam, notissimum Palladis symbolum, sexcenties Atheniensium numis impressam, spectare manifestum est.

Alia porro nomina similia a Polluce asservata sunt. qui tradit quaedam Atheniensium numismata Pallades, virgines, puellas, Corinthiorum pullos dicta esse (IX 74 sqq.): ἀλλὰ καὶ κόρη νόμισμα παρ' Ἀθηναίους ἦν, ὡς Ὑπερείδης φησὶν, τῷ παιδίῳ τῆς ἐν Βραυρωνίῳ ἱερείας τῶν ἀναθημάτων τι λαβόντι παρὰ βληθῆναι λέγων ἐπὶ πείρα συνέσεως κόρην καὶ τετραδραχμον, κάπειδ' ὃ τὸ τετραδραχμον εἴλετο, δόξαι διακρίνειν ἥδ' ὃ τὸ κέρδος δύνασθαι. τάχα δ' ἂν εἴη κόρη, ὡς Εὐριπίδης ὠνόμασε παρθένον ἐν Σκίρωνι, λέγων περὶ τῶν ἐταιρίδων τῶν ἐν Κορίνθῳ

καὶ τὰς μὲν ἄξῃ, πῶλον ἂν διδῶς ἔνα,  
τὰς δὲ ξυνωρίδ'.<sup>1)</sup> αἱ δὲ κατὰ τεττάρων  
φοιτῶσιν ἵππων ἀργυρῶν· φιλοῦσι δὲ  
τὰς ἐξ Ἀθηνῶν παρθένους, ὅταν φέρῃς  
πολλὰς.<sup>2)</sup>

τὰς μὲν οὖν παρθένους λέγοι ἂν τὰς κόρας, αἷς ἐνεχάρακτο Ἀθηνᾶς πρόσσωπον, ὅθεν τὸ νόμισμα τοῦτ' Εὐβούλος ἐν Ἀγχίσῃ καλεῖ Παλλάδας<sup>3)</sup>, πῶλον δὲ τὸ νόμισμα Κορίνθιον, ὅτι Πήγασον εἶχεν ἐντετυπωμένον. Ad κόρας quidem Gardnerus mihi videtur suo iure annotasse eas drachmas forsitan fuisse, quum pateret, eas minus quam tetradrachma valuisse et didrachma, quae Euripidis certe aetate abolita erant, boves vocata esse. Nec quempiam fugit, tria illa Atheniensium vocabula numaria omnia ad Palladis caput, signum anterioris partis, referenda esse. Quod autem ad πῶλους Corinthiorum attinet, poeta aptissime hoc vocabulo usus est, ut meretrices significaret, quandoquidem πῶλος et pullorum equinorum et puellarum notionis est.

His adiunge χελῶνας Aegineticorum et φωκαίδας Phocaeensium, quorum alterius mentionem iam fecimus, quum ad βοῦς explanandos proverbium illud: τὰν ἀρετὰν καὶ τὰν σοφίαν νικᾶντι αἱ χελῶναι apposissemus. Mentione praeterea dignum est, quod Eupolis Polluce auctore<sup>4)</sup> obolum Aegineticum ὀβολὸν τὸν καλλιχέλωνον dixerat, haud dubie propter pulcram typi formam. Alterum Pollux attingit, qui scribit (IX. 93): Θουκυδίδης<sup>5)</sup> μὲν δὲ καὶ στατήρας τινὰς Φωκαίτας κέκληκεν, ἣν δὲ τι καὶ νομίσματος εἶδος οὕτως ὀνομαζόμενον· φησὶ γοῦν ἐν τοῖς Ἀποφθέγμασιν ὁ Καλλισθένης ὑπὲρ Εὐβούλου τοῦ Ἀταρνεΐτου τὸν ποιητὴν Περσῖνον ἀμελούμενον εἰς Μυτιλήνην ἀπελθόντα θανατά-

<sup>1)</sup> ξυνωρίδα i. e. δύο πῶλους cf. Valckenaer ad Eurip. Phoen. v. 331.

<sup>2)</sup> Nauck: Fragm. trag. Graec. p. 451.

<sup>3)</sup> Meineke: Fragm. comic. Graec. ed. mai. III p. 204.

<sup>4)</sup> IX 74.

<sup>5)</sup> Thucyd. IV c. 52.

ζονται γράφαι διότι τάς Φωκαίδας, ὡς ἔχων ἦλθεν, ἦδ' οὖν ἐν Μυτιλήνῃ μᾶλλον ἢ ἐν Ἀτάρνῃ καταλλάττει. Etiam hoc nomen, quo sexta στατῆρος pars notari solet, a signo numorum, vitulo illo marino tractum est.<sup>1)</sup>

Medii inter haec quae attuli vocabula et ea quae allaturus sum ab imaginibus principum assumpta, τοξόται Persarum sunt, ita nominati, quod rex in eis sagittarii instar repraesentabatur. Nam apud Plutarchum (Ages. c. 15) legitur: τοῦ Περσικοῦ νομίσματος χάραγμα τοξότην ἔχοντος ἀναξευγνόνων ἔφη μυρίαις τοξόταις ὑπὸ βασιλέως ἐλαύνεσθαι τῆς Ἀσίας. Arcus semper fuit proprium insigne regis Persarum. in opere illo musivo, quod Alexandrum fertur Darium Codonannum fugantem depingere,<sup>2)</sup> ac saepenumero in numis ei attributa.<sup>3)</sup>

Hoc idem numismatum genus etiam Δαρεικοί appellatum est, quia Darius qui Persarum rem numariam diligenter curavit primum sua effigie numos denotaverat, ut signum eis auctoritatis regiae esset. Quamobrem Pollux annotat (III. 87): οἱ Δαρεικοὶ ἀπὸ Δαρείου, ὡς ὑπ' ἐκείνου ἀκριβοθέντες εἰς κάθαρσιν τοῦ χρυσοῦ, quibuscum Herodotum compares (IV. 166): Δαρειῶς μὲν γὰρ, χρυσοῦν καθαρώτατον ἀπεψήσας ἐς τὸ δυνατώτατον, νόμισμα ἐκόψατο. Tritissimum erat Graecis hoc nomen, quum multi eorum ex parte Persarum stabant eorumque auro corrumpebantur, quo hi Aristophanei versus spectant (Eccles. 601 sq.):

πῶς οὖν ὅστις μὴ κέκτηται γῆν ἡμῶν, ἀργύριον δὲ καὶ Δαρεικοὺς, ἀφανῆ πλοῦτον.

Praeter Δαρεικοὺς Pollux in libro nono (c. 85) alias significationes numarias commemorat: ἴσως δὲ τῶν ὀνομάτων καταλόγῳ προσήκουσιν οἱ Κροίσειοι στατῆρες, καὶ Φιλίππειοι, καὶ Δαρεικοί· καὶ τὸ Βερενίκιον νόμισμα καὶ Ἀλεξάνδρειον καὶ Πτολεμαϊκόν, καὶ Δημαρέτιον, ὧν τοὺς ἐπωνύμους γνωρίζοντων ἀπάντων, ἡ Δημαρέτῃ Γέλωνος οὖσα γυνή, κατὰ τὸν πρὸς Λίβυας πόλεμον ἀποροῦντος αὐτοῦ, τὸν κόσμον αἰτησαμένη παρὰ τῶν γυναικῶν, συγχωνεύσασα νόμισμα ἐκόψατο.

Ac Philippei, a Philippo Macedonum rege cusi,<sup>4)</sup> quarto a. Ch. saeculo sola propemodum Graecorum aurea moneta erant. Hinc nomen Φιλίππειων ad Romanos propagatum est. Nam Plautus et Terentius ex fabulis Novae Comoediae

<sup>1)</sup> ἔχται φωκαίδες cf. C. J. G. n. 150 A. l. 41. 43. ibid. p. 236.

<sup>2)</sup> Heydemann: Alexander d. Gr. u. Dareios Kodomannos. 1883.

<sup>3)</sup> cf. Curtius: Die knieenden Figuren der altgriech. Kunst t. n. 1. Arrian. Anab. II 11, 5. III 15, 5.

<sup>4)</sup> Diodor. XVI 8: νόμισμα χρυσοῦν κόσας τὸ προσαγορευθὲν ἀπ' ἐκείνου Φιλίππειον.



Atticae id acceperunt et ad numismata aurea, Romanis tunc ignota, usurpaverunt, velut his ex versibus Plauti elucet: Trimum. 953sq.:

An ille tam esset stultus mihi qui mille numum crederet Philippum, quod me aurum deferre iussit ad gnatum suum? et Asinar. 153sq.:

Unum quodque istorum verbum numis Philippis aureis

Non potest auferre hinc a me, siquis emptor venerit.

Posteriore aetate Romani pecuniam ipsam, non quoddam eius genus, ita vocaverunt: „Philippei nostri vultus“ imperator Valerianus dicit; „argentei Philippei minutuli“ et „aerei Philippei“ alibi obveniunt.<sup>1)</sup>

*Δημαρέτεια* porro haud ita multo post clarissimam illam Gelonis victoriam Himerensem (ao. 480 a. Ch.) emissa esse, Mommsenius demonstravit.<sup>2)</sup> Diodorus enim narrat,<sup>3)</sup> Carthaginenses Demaretæ, tyranni uxori, propter secundas pacis condiciones, quas a coniuge petivisset, auream centum talentum coronam donavisse, qua ea ad numos percutiendos usa esset. καὶ στεφανωθεῖσα ὑπὲρ αὐτῶν ἑκατὸν ταλάντοις χρυσίου, νόμισμα ἐξέκοψε, τὸ κληθὲν ἀπὲρ ἐκείνης Δημαρέτειον τοῦτο δ' εἶχεν Ἀττικὰς δραχμὰς ὀξέα, ἐκλήθη δὲ παρὰ τοῖς Σικελιώταις ἀπὸ τοῦ σταθμοῦ πεντηκοντάλιτρον. Plura exemplaria, signo leonis currentis notabilia, quod typo quadrigae additum est, ad nostrum aevum permanserunt,<sup>4)</sup> eximiae pulchritudinis, sed Demaretæ caput non perhibentia.

*Ἀλεξάνδρειοι* autem ab impressa regia facie drachmæ et oboli dicebantur. Quamobrem a Polybio traditur (XXXIV 8. 7): καὶ ὁ μὲν τῶν χρυδῶν Σικελικὸς μέδιμνός ἐστι δραχμῆς, ὁ δὲ τῶν πυρῶν ἐννέα ὀβολῶν Ἀλεξανδρινῶν, et ab Appiano (Sicil. II 24): ἔχει δὲ τὸ Εὐβοϊκὸν τάλαντον Ἀλεξανδρείου δραχμὰς ἐπτασιγμῖους.<sup>5)</sup>

Ad *Κροισίους στατῆρας*<sup>6)</sup> denique *Γυγάδας χρυσός* addatur quem a Gyge prisco Lydorum rege emissum Lenormantius repperisse sibi videtur.<sup>7)</sup>

Postremo numi saepenumero ab urbe, cuius a magistratibus feriebantur, nominata sunt. Nam in inscriptionibus templi Deliaci et Eleusini, brevi antehac promulgatis, enumerantur: στατῆρες Αἰγινάιοι, Ἐφέσιοι, Κορίνθιοι, Κρητικοί, Κυζικηνοί.

1) Mommsen: Geschichte des röm. Münzwes. p. 782 n. 135.

2) ibid. p. 70.

3) XI c. 26.

4) Num. Chron. 1874 p. 8.

5) cf. Hultsch l. l. p. 245 n. 4.

6) Num. Chron. 1881 p. 300 n. 63.

7) Pollux III 87: εὐδόκιμος δὲ καὶ ὁ Γυγάδας χρυσὸς καὶ οἱ Κροίσειοι στατῆρες

δραχμαὶ Δηλία, Ἀιγιναία, Ροδία, Σικωνία, Φωκαῖς, Χαλκιδική, ὁβολὸς Δελφικοῦ νομίσματος, Ἰστιαϊκὸν νόμισμα.<sup>1)</sup> Sed haec praetereunda sunt, quandoquidem ad typos nihil valent.

Quae igitur his ex locis antiquorum scriptorum de typis intelleguntur, quamquam scitu digna tamen et perpauca sunt neque omnia plenam auctoritatem et fidem habent. Sed apparet, signa numorum maximam utilitatem et ad alias res perspiciendas et ad mythologiam illustrandam afferre, quia moneta deorum propria erat eorumque nimirum notas perhibebat. Qua re nostrum erit, ut quarundam urbium insignibus mentalibus collatis ad mythologiam clariore luce collustrandam materiam colligamus.

---

<sup>1)</sup> Les monnaies royales de la Lydie.

<sup>2)</sup> Bulletin. de corresp. hellén. 1882 p. 132. cf. Journ. of Hellen. stud. 1883 p. 243 sqq. *Εφημερίς ἀρχαιολογική* 1883 p. 126.

## Vita.


Natus sum Emil Karl August Eisenbeck Gedani Cale di Junii anni h. s. LVIII, patre Carolo, quattuor ante annis iam tuo. matre Guilelma e gente Prehn. Fidem profiteor evangelicam. Primis litterarum elementis in schola, quae civilis appellatur, imbutus a vere anni LXXII gymnasium frequentavi. Maturitatis testimonium autumnali tempore a. LXXX adeptus per quattuor semestria Lipsiae, per quattuor deinde Berolini studiis philologicis, historicis, archaeologicis operam navavi. Lipsiae me docuerunt viri doctissimi Arndt, Biedermann, G. Curtius, Gardthausen, Hahn, Heinze, Hildebrand, Hirzel, Lange, Lipsius, Masius, † Noorden, G. Voigt, Wundt, Zarneke; Berolini Bresslau, E. Curtius, Dilthey, Furtwaengler, Huebner, Kiepert, A. Kirchhoff, Mommsen, Scherer, Vahlen. Per tria semestria Lipsiae seminarii regii historici sodalis fui, et interfui proseminario regio, Zarnekei seminario Germ., Hahnii societati geographicae; Berolini ad societates philologicas Vahlenus et Huebnerus, archaeologicas E. Curtius, Furtwaenglerus, Robertus, epigraphicam Kirchhoffius, historicam Weizsaeckerus benigne me admiserunt. Quibus omnibus viris doctissimis summam semper habeo gratiam, imprimis E. Curtio et Noordeno, praeceptoribus carissimis, qui optime de me meriti sunt. Ac † Guilelmi Mannhardt mentionem hic habeam, qui antequam in Universitatem iam migravi saepius per colloquium animum meum ad mythologiam advertit. Maximas ei ago gratias.

---

## Sententiae.

1. Paus. VI 22, 2 legendum est: *Πισαῖοι δὲ ἐφειλχύναντο ἀθλαίρετον συμφορὰν ἀπεχθανόμενοι τε Ἡλείους καὶ σπουδῇ ποιοῦμενοι τιθέναι τὸν Ὀλυμπικὸν ἀγῶνα ἀντὶ Ἡλείων, οἷγε ὀλυμπιάδι μὲν τῇ ὀγδόῃ τὸν Ἀργεῖον ἐπηγάγοντο Φεῖδωνα τυράννων τῶν ἐν Ἑλλήσι μάλιστα ὑβρίσαντα, καὶ τὸν ἀγῶνα ἔθρεσαν ὁμοῦ τῷ Φεῖδωνι.*
  2. E Pliniano loco (n. h. XXXVI 16): „Alcamenem Atheniensem, quod certum est, docuit (Phidias) in primis nobilem“ (non: id quod certum est) apparet, Plinio vel auctori, quem hic sequitur, controversiam notam fuisse, Alcamenesne Athenis an alio loco natus esset.
  3. Tac. Germ. c. 26 legendum est: agri pro numero cultorum ab universis in vices occupantur.
-










UNIVERSITY OF ILLINOIS-URBANA  
737E180 C001  
OBSERVATIONES IN MONETAM GRAECAM. BEROLI



3 0112 023642983